

地 360.139
137
:20

卷四十六
大事志 本末

興義府志



興義府志卷四十六

大事志 本末

順治克取安龍府安南衛普安州本末

順治平馬乃亂設普安縣本末

康熙克復安籠所安南衛普安縣本末

康熙設安南縣本末

康熙設南籠廳本末

康熙平三江獯設左營于黃草壩本末

雍正畫黔粵界設南籠府永豐州本末

嘉慶平南籠府苗改名興義府本末

嘉慶平永豐州苗改名貞豐州本末

興義府志

卷四十六

目錄

一

貴陽文通書局代印

嘉慶平普安縣安南縣苗本末

嘉慶平黃草壩苗設興義縣本末



興義府志卷四十六

興義府知府張鏞纂修

大事志

國朝大事本末

志大事本末。前卷志歷代大事。此卷志

國朝大事。其敘述

國初事。徵考載籍舊文。間有微近違悖語。皆謹刪。不敢妄錄。至敘述近事。遇有事涉謠讖怪異者。亦概刪削。而附論于篇末。志

國朝大事本末。

順治克取安龍府安南衛普安州本末

順治十三年。明將李定國等。奉永明王去安龍府。西走雲南。留其將。

興義府志

卷四十六

本末

貴陽文通書局代印

分守安龍府。安南衛。普安州。時安龍諸地。尚爲明有。既而王居滇。孫可望在貴陽。謀叛王。以妻孥在滇。未敢發。未幾王送其妻孥至貴陽。可望遂反。與李定國等戰于交水。大敗。定國使白文選等追之。可望窘迫。棄貴陽。走長沙。降于我大清。于是

章皇帝始議進兵西南。窮討明孽。十四年二月。以貝子託羅。爲甯南大將軍。平西王吳三桂。爲平西大將軍。都統卓布泰。爲征南大將軍。洪承疇。爲經略。進兵雲貴。分兵三路。託羅由湖南入黔。爲中路。吳三桂由四川入黔。爲北路。卓布泰由廣西入黔。爲南路。十五年四月。卓布泰與提督線國安。自廣西入黔。取荔波都勻。敗張先璧于獨山。取之。五月。

章皇帝以三路兵。無統帥。又以信郡王。為安遠大將軍。統之。亦由中路進。九月。信郡王至貴州之偏橋。時明將張先璧等屢敗。咸告急于定國。定國以關有才之亂。弗克援。既而平有才亂。乃東出。使馮雙鯉屯盤江東。祁三省屯雞公背。劉正國屯安莊。以扼我中路。白文選屯七星關。羅大順屯水西。以扼我北路。李成爵屯涼水井。按今興郡地。張克璧屯黃草壩。按即今興義縣治。以扼我南路。而定國自居盤江。為中軍。以策應。未幾。卓布泰自都勻。取道泗城州北境。按即今由西隆州。渡南盤江。入貞豐州之道。明之泗城州北境。即今西隆貞豐地。遣人招土官岑繼祿。繼祿喜。以兵為鄉導。遂至安龍府之東界。按即今貞豐州地。十一月。明伯李成爵在涼水井。聞卓布泰兵至。遣別將至羅炎河。按河在今貞豐州境。悉鑿其渡舟。沉之。卓布泰不能渡。已而沉舟。自下流浮出。繼祿見之。以告。使人牽取補苴。中夜。師濟。明師少。

興義府志

卷四十六

本末

三

貴陽文通書局代印

線國安馳入其師。敗之。斬獲幾盡。明日。進至涼水井。李成爵率眾萬餘。嚴陣以待。我軍四面攻之。陣堅不能破。俄一護軍陷陣。眾從之。明師遂潰。斬李成爵于涼水井。遂克安龍府。改名安籠所。此安籠入版圖之始也。定國聞之懼。乃以兵三萬。倍道趨南路。十二月。卓布泰自安籠所。進兵禦之。遇于雙河口。按今貞豐州地。定國扼險。據山巔。卓布泰仰攻。失利。明日。定國眾益至。分為三十營。退扼陸路。列柵以守。而以象前拒戰。卓布泰分兵為三。張左右翼進。發礮擊之。象不退。已而南風大至。礮火落野中。茅葦悉燃。而北向。卓布泰益發礮擊之。象反奔。大軍乘之。定國不能支。遂走。大軍追敗之。師少息。定國遁。侍衛邁圖。又以輕騎先進。敗之于葛慢立寨。獲其象馬數百而還。張先璧聞定國敗。軍自潰。走雲南。定國收散卒。復屯盤江之鐵索橋。卓布泰入普安。

州。于是普安又入版圖矣。時信郡王已斬劉正國于安莊。又敗祁三省。馮雙鯉于雞公背。雙鯉奔盤江。就定國。三省奔七星關。就白文選。卓布泰既入普安。遂自普安向羅平。而白文選又爲吳三桂所敗。定國懼失雲南。遂焚鐵索橋以遁。信郡王軍至盤江。結筏以渡。進收安南衛諸地。追定國不及。而追及文選于松嶺衛。又敗之。定國走雲南。于是安南衛普安州地。咸入版圖矣。後二年。有普安州馬乃營土目謀叛事。討平之。收其地。置普安縣。見名臣傳、貳臣傳、東華錄、通志、普安州志、貴州紀年、聖武記。

順治平馬乃亂設普安縣本末

順治十七年四月。普安州馬乃營土目龍吉兆反。掠安南泗城。時雲貴初平。各土司皆奉貢賦。受約束。惟吉兆與安南屯軍王回子爭田相仇。吉兆因收養亡命。造軍器。奸民文元等附之。使人遙結李定國。

爲聲援。約鼠場營土目龍吉佐。樓下營土目龍吉祥反。掠泗城土寨。及安南衛。阿計屯諸處。所過屠戮。總督趙廷臣與巡撫卞三元。數遣使招之。不降。乃合疏請討。十一月。廷臣率兵征馬乃。分其軍爲三路。平西王吳三桂遣其總兵馬寶。趙良棟助之。十九日。破果母寨。殺賊數千。擒吉兆子。吉佐妻。斬文元于陣。乘勝攻味呷寨。吉兆閉寨拒守。廷臣圍之。十八年二月。廷臣令軍士人持一炬。投其寨焚之。執吉兆及其黨。送雲南。三桂殺之。廷臣以功。進兵部尙書。于是析普安州之馬乃營。鼠場營。樓下營。三營土目地。又析安南衛之阿計營。安逸營。二營地。及興仁里。興讓里。二里地。置普安縣。是時縣與新城所。同城而治。隸安順府。此普安設縣之本末也。後康熙十年十二月。黔撫曹申吉疏奏。新城所。與普安縣同城。屯賦無多。軍丁亦少。宜裁所歸縣。

從之。遂裁新城所。併其屯地于縣。二十二年。又裁新興所。徙縣治于新興所城。則即今之普安縣治。是也。至雍正五年。升南籠廳爲府。始以普安縣改隸南籠府。嘉慶二年。改南籠府爲興義府。而縣仍隸焉。
見名臣傳、東華錄、天下郡國利病書、通志、普安州志

康熙克復安籠所安南衛普安縣本末

康熙十二年十二月。吳三桂反。時安籠所安南衛普安縣諸地咸陷。
沒。按今之興義縣地。時爲普安州之南境。捧鮮營、黃坪營、布雄營、三土目地。今之貞豐州地。時爲泗城州之北境。長壩册亭。諸甲地。亦皆陷。十七年七月。三桂死于衡州。其孫世璠僭位。十九年。世璠走貴陽。閏三月。

仁皇帝命定遠大將軍貝子彰泰。征南將軍穆占。綏遠將軍蔡毓榮。進兵貴州。十一月。世璠棄貴陽西走。彰泰等入貴陽。是月。

興義府志

卷四十六

本末

五

貴陽文通書局代印

仁皇帝又以都統賚塔。爲平南大將軍。貝勒額赫納。叅贊都統希福。瑪奇。趙璉。護軍統領赫呼布。副都統宏世祿。祖植椿。兩廣總督金光祖。福州將軍馬九玉等。皆屬焉。將滿漢兵。自南甯取道田州泗城。進兵雲貴。十二月。彰泰。令湖廣提督桑額。復安順永甯。與叛將李本深。戰於雞公背。敗之。本深走渡盤江。焚鐵索橋。以遏追兵。桑額至盤江。蔡毓榮使人招土司沙起龍。李廷試。咸以土兵會大軍於盤江。桑額令之構浮橋。橋成。師濟。本深扼盤江西岸。結寨山上。大軍環攻之。本深不支。遂降。械至京。磔死。遂復安南。賊將線絨。復守江西坡。二十年正月。彰泰自率大軍濟盤江。至江西坡。扼賊衝要。別令沙納哈。公圖。從間道繞出其後。公圖如計。銳入賊營。奪其險。自坡巔大呼下。絨揮兵迎擊。彰泰自坡麓冒險上。與公圖夾擊。絨敗。與其黨巴養元。李

繼業等遁。公圖追之。至蠟茄坡。遂復新興所。及普安州。此桑額克復安南衛。彰泰公圖克復新興所。普安州之本末也。賚塔之師。于十九年十二月。至西隆州。僞總兵周應龍聞之。先至安籠所之石門坎。營焉。石門坎在安籠所南三十里。爲滇粵交通之要道。險峻難登。故應龍扼之。二十年正月一日。賚塔度賊無備。濟南盤江。直趨賊營。希福、瑪奇、額赫納爲前鋒。宏世祿、金光祖、赫呀布、馬九玉、趙璉、祖植椿爲左右翼繼之。遊擊王朝欽以綠營兵爲遊兵。間道襲繼祖。奪其第一隘。瑪奇、希福、額赫納以前鋒從之。連奪十餘隘。後軍及二隊自下攻之。日中而戰。日入未決。前鋒及綠營兵礮矢俱盡。賊伏兵四起。前鋒護軍分隊堅立。賊迫乃夾擊。大敗之。盡奪其險。分兵據之。賊遁還安籠所城。明日大軍入安籠所城。復之。僞總兵陳應魁降。賊將何繼祖。

興義府志

卷四十六

本末

六

貴陽文通書局代印

走普安縣。

時普安縣治在新城所城。

與其黨詹養王有功。張光先等合。旋以普安

縣不足扼入滇衝。共屯于黃草壩。以抗我師。于是普安縣亦復。何繼祖列陣于黃草壩。而前之以象。賚塔至。分軍爲數隊。宏世祿率滿兵爲前隊。希福以前鋒。瑪奇以右翼。爲左右隊。賚塔自率諸軍。爲後勁。世祿突先陷陣。左右隊夾擊之。賚塔以時策應。戰自卯至未。賊少卻。我兵奮擊。遂勝之。奪營二十有二。斬級千二百。獲象馬無算。繼祖遁。于是黃草壩亦復。此賚塔克復安籠所普安縣黃草壩之本末也。至是今之全郡境悉復。而我軍遂乘勝入滇。復馬龍州矣。

見名臣傳東華錄逆臣傳

通志聖武記貴州紀年

康熙設安南縣本末

安南縣。乃明安南衛地。初明洪武十五年。置尾灑衛。領馬乃、阿計、安

逸三營地。及必黑、南俄、大定、上達、下達、五寨地。隸普安軍民府。二十三年。改設安南衛。治江西坡。置指揮使及僉事、同知、鎮撫、經歷等官。領前後中左右五所。所置千戶百戶。隸貴州都指揮使司。二十五年。徙衛治于尾灑堡。築衛城。卽今之安南縣城是也。萬歷四年。移永甯州知州。駐安南衛城。終明之世。因之。

國朝順治十五年。信郡王南征。至安南之盤江。明將李定國。燬鐵索橋遁。信郡王結筏濟師。遂進取安南衛。十六年。裁安南衛指揮。改設衛守備。經歷、教授各一。改五所地。編爲六里。曰新化、淳德、安化、會昌、興仁、興讓。隸安順府。是時馬乃營地。及必黑等五寨地。皆爲普安州土司龍氏所據。十八年。馬乃營土目龍吉兆反。掠安南。總督趙廷臣討平之。奏置普安縣。于是割安南衛之阿計、安逸、二營地。及興仁、興

讓二里地。入普安縣。康熙三年。裁安南衛訓導。五年。又裁安南衛經歷。十二年。吳三桂反。衛地爲所據。十九年十二月。提督桑額率師至安南之盤江。賊將李本深。燬鐵索橋遁。桑額構浮橋濟師。擊本深于盤江西岸。敗之。遂進復安南衛。二十六年。總督范承勳始奏請裁衛設縣。疏略云。安南衛在大道。管理驛站。應爲一縣。卽名爲安南縣。裁去守備千總各一員。改設知縣典史各一員。裁去教授一員。改設訓導一員。從之。于是始設安南縣。仍隸安順府。四十三年。巡撫于準奏設教諭。雍正五年。總督鄂爾泰奏改南籠廳爲府。以安南縣改隸南籠府。又割縣轄會昌里之董家旗、龔家屯、趙家屯、李家屯、尾灑村之左屯。改隸永豐州。乾隆二七十年。以長牛六甲地。舊爲普安州土司龍天祐轄地。安南縣之阿都田驛在其地。借地設驛。未便。乃割長牛

六甲地。隸安南縣。嘉慶二年。改南籠府爲興義府。而縣仍隸焉。見明史方

興紀要通志
安南志紀略

康熙設南籠廳本末

興義府。康熙時爲南籠廳。即明之安南所安隆所地也。初明洪武二十二年。置安南守禦千戶所。安隆守禦千戶所。其安南所城。副千戶不帖傑。築于楊那山。在今興義縣東北。七孔塘之南。正統十年。徙所城于羅渭江。在今興義縣之羅渭屯。安隆所。因元之安隆洞以名所。安隆洞。即今府北之乾音龍洞。後訛安隆爲乾龍。安隆所城。築于櫛鉢寨之陵元堡。即今之府城是也。安隆洞。舊有十二甲。安隆所分轄花障阿能二甲。凡三十六寨。其阿能甲十八寨。即今府之懷德永化里地是也。是時屯軍與土目。相錯爲治。宏治十一年。普安苗婦米魯

興義府志

卷四十六

本末

八

貴陽文通書局代印

反。廣西安隆土官岑軾。討平之。乃割阿能十八寨。以賞其功。阿能地。遂改隸廣西。萬歷四十三年。阿能土目三郎叛。殺安隆土官岑峯。峯子光裕弗能討。官兵討平之。光裕以阿能地歸朝。朝議。仍以其地屬安隆所。隸貴州。至明末。阿能地。復爲廣西安隆土官岑氏所據。迨國朝順治九年。明永明王居安隆。改安隆所爲安龍府。十五年。征南大將軍卓布泰南征。取道泗城州北境。招安隆土官岑繼魯爲導。遂至安龍府之東界。十一月。濟師。線國安擊敗明師。明日再戰。卓布泰斬李成爵于涼水井。遂克安龍府。改名安籠所。康熙五年五月。裁安南所。併入安籠所。六年十月。改貴陽府之畢烏通判。爲南籠通判。移駐于故安南所城。此南籠設廳之始也。名曰南籠者。以兼轄安南安籠二所地。合二所之名。以名之也。八年九月。總督甘文焜。奏請正南

籠廳疆界。復以阿能十八寨隸南籠通判。從之。十年十二月。巡撫曹申吉。又奏請改貴陽府之南籠通判。爲安順府南籠通判。移駐安籠所城。疏略云。十八寨田賦。貴陽通判駐安籠管理。察安籠。原屬于安順。廳既在安順駐劄。應改爲安順通判。考成官評。庶有所歸。從之。十二年。吳三桂反。南籠廳地爲所據。十九年十二月。征南大將軍賚塔。率帥入南籠廳境。二十年正月朔日。攻拔石門坎。明日。遂戰復安籠所城。二十六年。總督范承勳。奏請裁安籠所。併入南籠廳。疏略云。請將附近南籠廳之安籠所。裁併南籠廳管轄。裁去安籠所千總二員。從之。五十四年。設南籠廳學。後至雍正五年。始升爲府。見明史明一統志名臣傳

天下郡國利病書方輿紀要舊志通志識略

康熙平三江獠設左營于黃草壩本末

興義府志

卷四十六

本末

九

貴陽文通書局代印

黃草壩。今爲興義縣治。舊爲普安州之南境。捧鮓營。黃坪營。布雄營。三七日地。其黃草壩三江諸地。今皆隸興義縣。舊皆隸普安州。黃草壩之設左營也。以康熙四十六年八月。三江獠黃柱漢。仇殺奄章寨獠黃國家七人。又殺掠紅車。窪洞。阿里。三寨。總督貝和諾聞之。急遣官捕治。柱漢匿。而三江獠皆反。貝和諾請勦。令安順知府許天馥。副將李雄。先招散其黨。下江諸寨獠聽命。餘獠負固不出。於是大兵進勦。安籠總兵李得勝。及叅將王應龍。遊擊洪容。魯岱。以兵分布三江。雲南副將高文成。平遠副將駱儼。以兵屯其西。廣西守備劉鳳鳴。李霖。以兵屯其東。獠人抱應。抱省。益聚黨。拒官軍。十一月初四日。李雄至隴憂。獠人據儼。誘我軍仰攻。而伏兵於四坡。雄知之。遣把總林鳳翔。發伏擊之。伏盡。賊披靡。遂進奪中江要隘。東西二屯。亦並進。駱儼

帥兵由叢箐入法巖寨。巖高萬仞。懸崖陡峭。儼登巖。獯數百。標弩齊發。儼揮壯士擊却之。遂破法巖寨。高文成率兵由革乃渡河。搗豈都。豈那復會兵夾攻窪者。諸寨。獯人敗走獨石屯。屯高千尋。險絕無路。可登。獯人皆攀藤緣壁而上。我兵仰攻。獯人飛石禦之。傷者衆。俄知屯旁。汲道甚微。屯上無井。乃分兵扼其汲道。數日。賊無水窮困。乃共縛抱應。抱省以獻。賊遂平。三江爲今捧鮮巡檢分轄地。舊時去普安州遠。故獯敢蠢動。迨康熙五十年。提督王文雄乃疏請移駐左營遊擊於黃草壩。以鎮靖獯苗。疏略曰。安籠鎮之黃草壩。外連滇粵。內迫三江。去普安州二百餘里。非大員不足以彈壓。請移本鎮左營遊擊及千總一把總一兵三百駐防其地。庶能控扼要害。不至疏虞。新城舊駐右營遊擊。今其地在腹裏。無復他虞。請撤回本鎮。從之。蓋至是

始以黃草壩爲重地。駐左營遊擊。以鎮靖獯苗。而其地始安謐。至嘉慶二年。平黃草壩苗。而始設興義縣。見名臣傳通志

雍正畫黔粵界設南籠府永豐州本末

南籠廳之南鄉地。舊與廣西泗城土知府地。犬牙相錯。今之貞豐州。初設時名永豐州。舊亦爲泗城地。泗城土知府地。延袤千里。其北境。既與南籠廳之南鄉。及普安州之捧鮮諸地。犬牙相錯。獯狃雜處。地居黔粵之交。多爭界仇殺事。捕治急。黔急則走粵。粵急則走黔。二省交急。則深入險阻。且以土知府爲逋逃藪。爲患最深。雍正初。泗城府之西隆州古障土目王尙義。與普安州之捧鮮土目阿九。爭歪染。烏舍壩。犁魯礫。諸寨。互相焚殺。有年。三年正月。總督高其倬。廣西巡撫李紱。檄安籠總兵蔡成貴。勦阿九。成貴以二土目曲直未辨。請兩省

文員勘實。歪染諸寨之賦。果屬何州。係何土目強梁。然後用兵擒治未晚。其倬乃命普安知州。絨命西隆知州。會勘。至四年八月。二知州尙未勘。成貴乃疏請
勅兩省撫臣。委大員勘定。

憲皇帝命總督鄂爾泰議之。鄂爾泰言。西隆地多煙瘴。知州常寓省城。歲中惟冬季暫駐其州。愆期不勘之咎。多在粵省。請令貴西道吳應龍往勘。而粵撫亦遴大員同勘。鎮臣言土苗自相仇殺。向係外結。例無考成。是以頻年膜視。至當不易之論。乞准立限施行。且請畫正兩省疆界。是時泗城土知府岑映宸淫虐。五年。鄂爾泰奏請用兵擒治。取其地改土歸流。五月。

憲皇帝命廣西巡撫韓良輔李絨與鄂爾泰會議用兵。鄂爾泰以南

籠與泗城接壤。請與良輔等會于南籠。從之。時泗城之者相。普安之者坎。皆有土目互爭地。久持不決。映宸恃其強。六月。率衆三千。至者相。將攻者壩。聞鄂爾泰在南籠。懼不敢攻。鄂爾泰知其情。正告以將用兵其地。映宸惶恐。乞改流存祀。乃奏褫映宸土知府世職。免罪。安置浙江。予其弟映翰頂帶。奉其祖岑繼祿祀。繼祿者。順治中嘗導大兵。取今郡地。敘功。授土知府世職者也。鄂爾泰乃與良輔等。合疏奏請。南籠與廣西之泗城。畫紅水江爲界。升南籠廳爲南籠府。設永豐州。册亨州同。羅斛州判。以普安永豐二州。安南普安二縣。隸南籠府。紅水江之南。爲廣西泗城西隆地。紅水江之北。爲南籠府。永豐州。普安州地。從之。于是割西隆之羅煩册亨等四甲有半。泗城之長壩羅斛等甲。共十六甲。南北約三百里。東西徑六七百里。設永豐州。于長

壩設州治。按州治後移于珉球。設知州一。學正一。吏目一。羅斛等四甲。設州判。

并將桑郎甲。令其分理。按今羅斛州判。改隸定番。西隆所割之四甲有半。羅煩一

甲。剝弼下甲。屬州管理。其册亨龍渣二甲。邑結半甲。剝弼上甲。設册

亨州同分理。又設城守遊擊一。守備一。把總二。兵五百。以資防守。又

撥黔屬之董家旂。尾灑村。龔趙二家屯。李家屯。坡哈寨。打村寨。金井

寨。壩草寨。朵萬寨。羅帕寨。羅王村。等十處。統歸州轄。南籠廳改府治。

設知府一。經歷一。仍留南籠通判佐理。按通判今裁。將普安州。安南普安

二縣。并新設之永豐州。皆歸府轄。普安州之捧鮓。設一營。白雲屯。撥

弁兵扼險。法嚴。歪染。設汛防守。將黃草壩遊擊一。千總一。把總一。兵

三百。移駐捧鮓。按乾隆十年。又移遊擊駐黃草壩。將原駐捧鮓之把總一。兵五十。移

駐黃草壩。又于黃草壩。設普安州判一。分駐管理。後至嘉慶二年平

興義府志

卷四十六

本末

十一

貴陽文通書局代印

苗。始改南籠府為興義府。永豐州為貞豐州。裁普安州判。設興義縣

治于黃草壩。見名臣傳舊志通志貴州紀年

按名臣傳載。是時貴州巡撫何世璠。亦疏言。黔粵宜以紅水江為

界。而粵有十餘寨。插入江北。粵獍勾引潛匿。爭劫多事。欲杜爭端。

莫先正疆界。畫江而理。沿江設汛。永杜粵獍往來。則引匿焚掠之

患可息。大旨與鄂爾泰疏意同。

附文

會議分界設府疏

國朝大學士 鄂爾泰 滿洲 雲貴總督

為酌議黔粵畫江分界。添設文員營汛。以安邊境。以衛巖疆事。雍

正五年三月初三日。內閣交出。奉

上諭。上年八月內。貴州安籠總兵官蔡成貴奏。廣西西隆州古障

地方。王尙義等。與貴州普安州捧鮮地方之苗目阿九等。歷年互爭歪染、烏舍、壩犁、魯礫等寨。於雍正二年控告。焚掠無休。及臣抵任。卽通咨飭查。蒙雲貴總督高其倬。照准粵西撫臣咨移行臣。將阿九等。設法擒勦。臣思歪染等寨。未經審勘。屬粵屬黔。不便遽然用兵。請轉咨粵省撫提。各委賢員。于交界之地。研審踏勘。並查歪染各寨。錢糧現納何處。定案清理。果係何日強梁。再行擒治。雖經督臣高其倬。行委普安州知州。廣西撫臣李紱。行委西隆州知州。訂期會勘。無如託故遲延。至今未結。推原其故。因土苗自相仇殺。俱係外結。例無考成。是以瀕年膜視。伏懇
敕下黔粵撫臣。另委廉能大員。秉公審斷。以杜爭端。嗣後審理兩省交界土苗案件。請

敕部議定期限完結。于邊方似有裨益等語。朕將蔡成貴奏摺。發于鄂爾泰。令其定議奏聞。今據鄂爾泰奏。查得廣西西隆州古障地方土目王尙義等。與貴州普安州捧鮮地方苗目阿九等。歷年互爭歪染、烏舍、壩犁、魯礫等寨。于雍正二年正月控告。焚掠無休。兩年以來。自前任總督臣高其倬。並貴州巡撫提鎮諸臣。移行粵省撫提諸臣。屢經咨催。卽何世璠到任後。羽檄交馳。無如西隆地多煙瘴。該牧寄寓省城。一歲中。惟冬季暫駐其地。而一切催征事務。又復倥偬。遂至任催罔應。則愆期之咎。多在粵省。今准部咨。令臣與何世璠。委大員會勘。隨委貴西道吳應龍前往。並咨催粵西撫臣。遴委大員。速卽會審。俟審定詳報到日。臣等再當會議。竊思鄰邊地方。苗民雜處。劫掠無常。姑息因循。釀成此習。其故多由外

結。此至當不易之論。臣分別流土考成。使各有專責。不致互相推諉。遲延不結之處。繕摺具奏。經部議覆在案。至于黔粵之交。原有大江爲界。祇因犬牙相錯。以致彼此紛爭。今若畫江而理。江以南。屢之粵。江以北。屬之黔。則界限井然。防守稽察。皆易爲力。庶幾兩省之紛爭永絕。又不獨完結目前案件等語。鄂爾泰既稱黔粵二省。當以大江分界。使各加防守稽查。則爭端可以永息。今韓良輔、李紱前往雲南。與鄂爾泰面商苗地事宜。着將黔粵分界事情。一并會商妥議具奏。其土苗爭訟案件。例由外結者。應如何定限之處。亦着鄂爾泰、韓良輔、李紱議奏。特諭。欽此。欽遵。交出到部。移咨到臣。當經移行遵照在案。臣等前赴安籠地方。細加咨訪。面商酌議。除土苗爭訟案件。酌定例限另疏外。臣等會看得廣西西隆州、泗城府。與貴州普安州、南籠廳。永甯定番二州地方。俱犬牙相錯。土苗雜居。以致爭占地土。互相仇殺。積案不清。黔粵之交。原有大江爲界。欽奉

上諭。着臣等將黔粵分界事情。一併會商妥議具奏。欽此。欽遵。臣等查紅水一江。實天之所限黔粵也。粵西諸水皆清。獨此江色紅水濁。諸水遇灘。則紆迴迤邐。勢多平衍。獨此江奔騰湍激。壯若黃河。况發源于滇。流入粵之西隆州境。經東蘭那地等土司。入右江。由潯梧。經粵東之肇廣入海。粵在江南。黔在江北。南北釐然。並無錯壤。惟泗城西隆兩處苗獠地方。多有跨江而北。與黔省畛域相連。村寨相間。蠻性獷悍。輕生。睚眦必報。錙銖必較。黔員既難兼轄。粵員亦難遙制。遂致仇殺劫掠。紛擾無休。今臣等酌議。黔粵兩省。

以紅江爲界。江以南屬廣西。江以北屬貴州。使疆界分明。更無淆混。卽或有爭奪案件。事隸一省。亦易于完結。其南丹土州荔波等縣。距貴州地方甚遠。且素無爭奪。毋庸畫分。應將西隆州所屬之羅煩册亨等甲。共四甲半。零二十二寨。割隸貴州。泗城府所屬江北之上江。長壩。桑郎。羅斛等甲。共十六甲。亦割隸貴州。此西隆泗城所割江北地方。南北約三百里。東西徑六七百里。地旣遼濶。民復凶悍。若止歸併附近之黔屬州縣管轄。不但鞭長莫及。且恐向有仇隙。各圖報復。彼此不能相安。應請于泗城對江之長壩地方。設立州治。添知州一員專理。吏目一員佐之。學正一員。專司訓迪。東北羅斛四甲。與貴州定番永甯二州相連。土苗凶頑。山谿尤險。應設州判一員。並將桑郎甲。令其分理。卽駐劄羅斛甲地方。西隆

州所割四甲半有零。除羅煩一甲。剝弼下甲。與州治相近。外册亨龍渣二甲。岵結半甲。剝弼上半甲。相距窈遠。而册亨尤爲難治。應設州同一員。卽將龍渣岵結等甲。令其分理。駐劄册亨甲地方。州治應有武職防守。新改流地方。又屬兩省交界。尤藉兵威。應設守城遊擊一員。守備一員。千總一員。把總二員。兵五百名。以遊擊並千總一員。兵二百五十名。防守州治。以守備並把總一員。兵一百五十名。防守州同所治。以把總一員。兵一百名。防守州判所治。以上官兵。歸于安籠鎮統轄。所添之兵。黔省各標鎮協營。在在汎廣兵單。未便再行抽撥。應請召募充補。泗城之北。原有一肩作山。山勢高險。爲黔粵分界。而黔屬之董家旗。尾灑村。龔趙二家屯。李家屯。坡哈寨。打村寨。金井寨。壩草寨。朵萬寨。羅帕寨。羅王村等。十處。

迤東一線。穿入泗城腹裏。甚爲錯雜。今江北地方。旣改隸黔省。應將此十寨。併歸新設知州管理。更爲清楚。再安順一府。原轄三州。五縣。南籠一廳。地方廣濶。舊已鞭長莫及。今若再轄新設一州。又增數百里之地。勢難兼顧。除鎮甯永甯二州。普定安平清鎮三縣。仍聽安順府管轄外。并請將南籠所屬地方。改爲府治。添設知府一員。經歷一員。仍畱南籠通判。爲之佐理。將附近之普安一州。安南普安二縣。並新設之一州。俱歸南籠府管轄。則盤查倉庫。批審案件。得免往返稽遲。便于督催起解。庶兩府分治。事可無誤。又普安州之捧鮓地方。有養馬箐。穿連三十餘里。山勢嵯峨。樹木幽密。路徑崎嶇。蠻煙籠罩。爲三江之咽喉。苗獯之要隘。上江白雲屯。峭巖壁立。俯視各寨。險峻異常。惟有一徑。可以紆迴攀援而上。法巖

寨。山高十五里。路險巖危。歪染寨。煙戶百餘家。田多民富。以故苗獯居險負隅。若于捧鮓地方。設立一營。白雲屯之上。撥弁員帶兵扼險。法巖歪染二處。設立大汛防守。餘則相度形勢。設汛安兵。使之星羅碁布。會哨遊巡。不惟黔苗可以控制。卽粵獯亦不敢起釁。查黃草壩地界。在捧鮓之內。從無焚掠大案。應卽以駐防黃草壩之安籠鎮標左營遊擊一員。千總一員。把總一員。兵三百名。移駐捧鮓。將原防捧鮓汛之把總一員。兵五十名。移駐黃草壩。輕重緩急。更覺得宜。黃草壩民居稠密。漢多苗少。且距州遙遠。必須文員管理。應于普安州。添設州判一員。分駐其地。專理細事。併管三江。稽查奸究。遇有命盜重案。仍報州審詳。查黔省按察司衙門。有經歷照磨二員。並無執掌事件。合將經歷裁汰。卽改設普安州判。庶

文事武備。嚴密周詳。而邊方漢苗。得以安貼矣。如蒙
聖恩俞允。所新設州。并請

欽賜佳名。知府知州員缺。仰懇

皇上。將記名能員補授。或准臣于黔屬現任府廳州縣內。揀選題
補。遊擊守備千總。可以酌量裁調。不須添設。其州同州判經歷吏
目等官。請

敕下部臣。即行銓選。并鑄給知府知州學正經歷印信。遊擊關防。
以昭信守。除塘汛城垣衙署等項。俟估勘造冊。另行具題外。所有
會議畫江分界。添設官兵事理。臣等謹會同具題。伏乞

皇上睿鑒。敕部議覆施行。見鄂文
端集

嘉慶平南籠府苗改名興義府本末

興義府志

卷四十六

本末

十七

貴陽文通書局代印

嘉慶元年十二月二十三日。黃昏。南籠府城。雷大震。自西南向東北。
人畜俱驚。明年。有狃苗之變。狃苗。元史謂之仲家蠻。其種族自廣西
遷黔。而南籠府最多。性愚而獷。有女狃苗王囊仙者。以邪術誘惑其
種族。羣苗翕然從之。囊仙。府之南鄉洞灑人。王文學之女。梁阿載之
妻也。年十三。入山樵采。得石如卵而五色。常懷之。囊仙性詭詐。又其
家素習巫覡。故頗知巫術。既得石。遂言天賜異符。爲人治疾。偶有效。
愈自詫爲神。其父文學。與其黨王抱羊。韋朝元。又爲之附會。囊仙愈
自矜異。恒持白紈扇。往來諸寨。傳教狃苗。囊仙本解禁蛇蟻術。乃詭
曰。天仙下降。蛇蟻咸可使作陣。又私置米于山洞。給狃苗。能祈仙米
活人。狃苗視洞。果得米。于是羣奉以爲仙。其父文學。遂自稱大王公。
囊仙名其習術苗。男曰仙大。女曰仙姑。又有法仙光仙諸稱。皆令白

巾白衣。執白紈扇。曰。習術。則白巾扇能禦鎗礮。術成則仙。分命其弟子楊博外。楊阿角。傳術于册亭之昔年洞。韋阿信。王阿報。王顯明。李阿六。韋抱堵等。及女苗韋阿寒等。各傳術于其寨。徒黨日繁。韋阿信。卽七絡鬚是也。王報報。卽王光仙是也。尤爲猛悍云。乾隆六十年。署知府事曹廷奎。聞狃苗有逆謀。頗廉知其黨羽姓名。令經歷祝雲書。捕楊博外。楊阿角。王阿報。下之獄。已而惑于浮議。或釋或禁。逆黨益無忌憚。嘉慶元年。北鄉土目賀占鼈告變。廷奎已中浮議。不之省。大吏又令兵備道周緯。至南籠。釋謀逆黨。惟畱王阿報於獄。而以苗俗跳端公上聞。大吏樂於無事。遂信之。端公者。狃苗謂巫也。巫聚禱謂之跳端公。九月十四日。韋阿報之父韋抱發。與武舉人劉世昌。共執阿信首之官。廷奎又以上官指。弗敢發。仍寢之。時安籠鎮總兵花連

布。率郡之兵將。征銅仁苗。郡城惟遊擊姜冕。把總楊文海。外委王元禮。徐廣元。及兵百有奇。而姜冕又病足臥。不能任戰守事。惟文海。郡人也。忠而勇。奇偉多智。經歷金淳。忠誠嫻韜略。郡人倚之。入冬。城中婦孺。皆知狃苗將反。人心惶恐。歲暮。郡人共傳狃苗之木刻。已過永甯州之關索嶺。木刻者。狃苗調兵之符信也。以木爲契。中分之。分出則壯者行。合出。則老弱皆行。文海又令通狃苗語之陳炳。偵諜苗寨。炳歸。言狃苗已旗械具。尅期舉事矣。文海言之廷奎。廷奎倉皇無措。狃苗傳口號云。霧騰騰。燒普坪。南籠喫早飯。殺上雲南城。二年正月五日。狃苗悉反。廷奎觸楹死。其妾女雉經殉。苗焚普坪。至壩弄塘。塘兵被傷。逃入城。署經歷金淳聞變。召文海等至。毅然曰。事急矣。太守死。城中又無邑令。守城。淳責也。淳誓以死守。與城存亡。願諸君共矢

忠藎助守危城。保生靈。答

聖主。入召妻及一子三女。結五縷于屋梁。與訣曰。此去登城守。義不反顧矣。幸而濟。如天之福。不幸而城陷。悉投縷。毋遺忠魂。羞。皆曰諾。乃出與文海等巡城。時城外鄉民多避難至城下。淳命文海與其子生員楊國珍。縋城察之。察非奸細。乃開門納之。又與文海周巡雉堞。計守兵須千二百有奇。城兵僅百。不能徧守。而時已夜將半。懼苗驟攻城。乃出奇計。城堞咸焚。棒香樹之。棒香。郡俗之線香。大如棒者也。鼓譟乘之。苗遙望。疑爲燃礮之繩火也。不敢遽逼。味爽。乃薄城。則已募義勇徧守矣。淳又與文海計。籌食餉。令搜城中粟。得三千石有奇。出庫銀三千兩。益以紳民助銀千。粵商銀二千。備緩急。諸生周琛。請以其家山木供薪。從之。食餉籌定。令官紳義勇分守各門。郡城門五。

曰。東門。南門。大西門。小西門。北門。惟南城踞山。最高峻。可遠見城外數十里。淳令北門至東門。文海等守之。東門至龍井。訓導吳永輔。外委徐廣元等守之。龍井至南門。諸生邢思孔等守之。南門至大西門。教授白象乾。外委王元禮等守之。大西門至小西門。勇士張運吉。貢生張維世等守之。小西門至北門。郡紳張連崑。武舉人劉君成等守之。城北隅。有平遠大礮。勇士趙申等守之。南門最高峻。淳與武舉人楊德榮等守之。而望城中。以時策應。又命郡人郭懷仁等。主支發銀米事。文海子國珍。主召募義勇事。部署定。天將明。苗先焚北門外右營舊署。及附郭民居。至城下大呼。索府役李華。胡萬年等七人。七人者。曾爲虐于狎苗者也。旋苗數千。攻北門者三。咸爲文海伏兵擊卻。是夜。城上望逆苗。束柴爲炬。火光如晝。王囊仙張五色繖。持白羽扇。

左右仙姑環立。或畫符。或誦咒。衆苗舞標槍衝殺。城上發礮擊之。苗能禁礮。礮閉無聲。藥子咸不出。淳知爲邪術厭。乃以黑犬烏鷄血衅之。礮始震。苗稍却。自後苗連日攻北門。文海禦之。屢中火鎗。負傷嚴守。生員劉德彬助守北門。亦受火鎗傷。至初八日。苗又攻北門。各執生芻一束。以禦鎗礮。至城門。舉火焚門。門鐵盡紅。幾陷。文海奮擊。忽飛石中文海顛門。仆。旋躍起再戰。擊却之。其子國珍。以藥敷文海創。文海命急。以水灌城下水門。左右問故。文海曰。水門有苗。戴牛皮。持火入。必計焚城中也。急灌之。彼計破矣。國珍灌之。遲明啓視水門。果有死苗。如文海言。俄大王公王文學率苗大至。銳攻北門。文海發大礮。擊死大王公。于是命兵勇築塞北門以禦苗。郡城五門。惟北門最當。苗衝。苗更番迭攻。故文海戰守最苦。初城中喪知府。流寓士民咸

欲縋城遁。已而苗掘寓人墓。婦女悉被污辱。乃憤不出城。咸出資盡力。助官死守。淳與文海。又以時拊循勸戒之。故守益堅。淳馳使告急于大吏。又憂城中無業饑民。爲苗內應。乃謀之。郡人曾鳳麟。鳳麟請捐金施粥。設廠聚之。以弭其變。從之。于是苗屢攻不克。而淳令兵勇時出突戰。勇士張運吉善射。羅天申善腰刀。越數日。輒出斬苗首。苗驚懼。旋天申中伏死。武舉人劉君成守城西北隅。率義勇出戰。進攻苗于黃泥寨。大坪。新莊。手斬苗三。礮斃苗三。追擊苗于許公亭。手斬苗二十。進戰于洗馬塘。又手斬苗十有二。救歸難婦五。擒七。縴鬚之。妾韋氏等六人。苗之銳氣稍挫。時郡轄之永豐州。普安縣。安南縣。及册亨州。同城。新城縣。丞城。黃草壩城。捧鮓城。皆被圍。而安順府之永甯州。歸化廳。及貴陽府之廣順州。定番州。長寨廳。大定府之威甯州。

黔西州。平遠州。諸狃苗盡反。初正月初五日。苗圍郡城。是日。永豐州苗。卽圍册亨城。州同曾艾。與把總楊烈等堅守。旋普安縣城。及新城縣丞城。被圍。安南縣知縣范來泰。遣兵馳援新城。是月二十日。道員吳某。率兵至安南。二十一日。苗圍永豐州城。知州明安泰。與守備江濤等堅守。二十六日。苗攻安南縣城。知縣范來泰。發礮擊却之。是月。巡撫馮光熊入奏。

純皇帝命雲貴總督威勤公勒保。自銅仁還兵攻勦。二月初一日。苗陷永豐州轄之定頭城。屠之。十六日。提督朱某。率援兵至安南。十八日。長寨守備崔林。率援郡城兵。至永甯州之馬鞍山。被苗截殺。戰敗。入州城。發礮。礮裂。林震死。二十日。提標參將鄒寬。率援兵至永豐。二十一日。册亨糧絕援絕。城陷。州同曾艾。與把總楊烈。外委梁國璋。死。

之。二十四日。苗之圍郡城者。金淳窺其意。漸驕懈。乃夜選壯士數百。四鼓會食。五鼓出戰。突薄賊壘。呼聲震天。苗不辨官軍多少。驚潰。自相躡殺。遂斬王仙姑于東門橋。馘首三百。生擒十餘人。苗勢稍蹙。時苗攻據永甯州之關索嶺。扼斷貴西要道。守關索嶺糧臺之千總李華純等。死之。華純。郡之安南人也。于是貴西道梗。文報不通。巡撫馮光熊。率兵至安順府。頓兵不進。三月。苗陷廣順州之壩場。省城戒嚴。初五日。勒保率大兵。攻克關索嶺。道始通。關索嶺之戰。郡人外委劉紫紱。奮勇突擊。斬苗無算。身被三傷。勒保壯之。時郡城被圍久。郡之四鄉士民。皆起義勦苗。戰死者不可勝數。尙家莊。貢生李萃中。集海子莊。尙家莊。莊家莊。三莊士民。保于莊家莊後山。屢與苗戰。弗勝。皆死之。時有劉青萬者。從萃中起義。同戰死。其子思聰逸。後詣大軍。自

請勦苗立功。擒得殺青萬苗。斬以祭父。郡人莊之。有法桶貢生周禮官。與貢生周正通。召募義勇。得勇士羅定倫。姜安齊。令統之。與苗戰。多所殺傷。卒以衆寡不敵。定倫。安齊。皆戰死。禮官與正通。督義勇。繼進。擊走苗。生擒苗三。已又與正通。自沙鍋山。進擊苗。中伏。皆死之。禮官之族。有周謙者。兄弟九人。弟曰諫。誠。謐。讓。誠。詢。誦。詠。九人皆生員。孝事母。母楊氏。年九十三矣。語諸子曰。兒輩當起義勦苗。爲忠臣。我老。固當死。母苦守我。乃閉戶。欲雉經。謙等泣諫曰。母若不諱。是兒皆不孝子也。焉有不孝子。而能爲忠臣。願負母逃。起義事。雖急。必有人爲之。非兒今日最切務也。遂負以逃。逃一里。而三遇賊。乃匿山洞。謙令諸弟他逃。而已護母。諸弟皆欲謙逃。卒皆不逃。謙有子曰紹文。亦生員。諸父逼之逃。逃而復反者五。俄而苗大至。焚山洞。一家八十二

人皆死。郡人哀之。有阿溪寨生員楊禮官者。集石版井。壩弄塘。錢相坪。阿溪。喇橋。諸寨士民。保于壩弄後山。而自率族人。及難民二百餘人。扼挖銀口。與苗十餘戰。皆有斬獲。三月十七日。苗大至。腹背受敵。禮官與其屬。皆戰死。有新屯生員李有恒者。年八十二矣。起義五日。中得義勇三百人。屯于老韋坡。與苗戰。前後殺數百苗。已而苗大至。有恒力竭。死之。三百人無一免者。有恒之族。有李淑者。年亦八旬。官黔西學正。引年歸。有恒起義。淑策馬。挈妻孥。保于別寨。獨免難。有沈紅寨生員沈啓明者。集陳家莊。壩歪。坡角。阿勒。黑土坡。阿堵。諸寨士民。起義禦苗。夜襲苗卡。弗克。走趨法桶。與苗遇于代洞坪。苗四起攻之。皆戰死。有北鄉民李鴻烈者。有膽識。逆苗王抱羊。誘之入黨。鴻烈伴諾之。而陰結壯士。爲誅逆計。及抱羊反。鴻烈起義勦苗。屢戰力竭。

其壯士鄭鴻德等二十人。皆戰死。鴻烈被執。苗予酒食。勸從逆。鴻烈大罵。苗拘之空室。使人說之。鴻烈自刎。有婁孔寨民史鴻浩。史鴻治。史鴻達者。各募義勇。得四百人。分爲三隊。各率一隊。屢合擊苗。多斬獲。進至灑雨溪。戰敗。殲焉。有魯屯民李大章者。率族人一百二十二。人。募義勇數百人。勦苗于阿足河。匡灣寨。勝之。直趨郡城。將以解郡城圍。至柳樹井。中伏。皆戰死。有蒙飄寨民王道隆者。募義勇數百人。攻苗于龍廣。勝之。進至火蒙坡。革多所斬獲。遂至馬鞭田。苗據都威橋。以弩射之。而運標鎗薄擊。道隆與數百人。皆死。有打鴉寨民黃榜者。募義勇勦苗。戰敗。一家死者四十人。其子敬先。志先。守先。逸。復助武生陳啓麟起義。破苗于興隆山。有大栗樹民周元龍者。集鄰寨壯士。保于紅硝牛皮二洞。擊苗。弗勝。同戰死。有郡生員景霽者。授徒于

下捧寒。苗誘霽爲軍師。霽怒罵。苗曰。先生從我。我以苗軍數萬奉先生。何憂于華衣美食。不然。血濺先生頸矣。霽罵愈力。奪苗刀。自刎。苗斷其頭。市威于人。有北鄉狎苗毛天佑者。與其屬十人。誓不爲逆。逆苗未反。則告變。逆苗既反。天佑令其屬梁世祿。王仕林。岑有名。王長生。分四路。刺探苗情。密告金淳。又令李文魁。李取才。李朝貴。李元富。韋三富。五人。暗中護送文報。事覺。逆苗執十人。笮掠之。九人皆死。天佑忿罵。逆苗勸從逆。縛天佑妻孥十餘人。至。按刃語天佑曰。從則皆生。不則皆死。天佑忿罵曰。與其作逆苗生。不如作義士死。與其爲逆苗而畱亂種。何如爲義士而聚忠魂。逆苗怒。盡殺之。惟一子逸。旬有五。日。潛歸。竊尸葬之。面如生。時起義勦苗。而與苗戰守最久者。則有布政司理問銜。普坪生員趙旭日。其弟武生旭昌。奇勇。旭旦起義。從

之者千餘人。旭旦與之保于真武山。擊苗于挖銀口。而分守卡子河隘。已而卡子河隘爲苗奪。進圍真武山。山路險峻。旭旦堅守。凡四月。苗弗能破。未幾山上糧絕。殺牛馬以食。後將人相食。尙死守。旋苗銳攻。旭旦與其弟旭昌等千餘人。皆戰死。又有阿棒塘民聶士星、楊啓珍者。初與其屬十五人。爲苗驅至普坪。勸從逆。十三人弗從。皆被殺。士星世珍逸。至羊場。募義勇二百餘人。以擊苗。力戰數月。四月初一日。苗大至。夜襲之。弗勝。皆死之。是月十八日。勒保大兵至安南。時郡人千總馬韜。從勒保。解安南圍。與苗戰。手斬執白旗逆首一。追至大排山。焚苗卡四十有五。拔難民二百九十七人。郡兵張世鳳。擊苗于安姑塘。手斬苗二。勒保又分兵。攻排杉汛。涼風坳。郡人守備李錦。追擊苗于涼風坳。戰死。旋勒保又通道至新城。解新城圍。新城之戰。郡

人外委楊國仁。戰最力。手斬苗七。時郡城被圍已四月。金淳募有膽略。通苗語者三人。曰景世龍、蕭立章、楊世棟。以蠟書趣援于勒保。勒保令遊擊常山。馳援郡城。五月。純皇帝又命兩廣總督吉慶。率粵兵。由廣西之西隆州。渡紅水江。入郡境。又命普洱總兵書麟。率兵自歸化廳。趨永豐州。與勒保會兵合勦。時郡人有南鄉民孔朝輔者。自正月起義。募義勇勦苗。扼守石門坎。勢強地險。苗不敢踰石門坎者五月。至是苗三路並進。銳攻。力弗能敵。朝輔與義勇皆死之。是月。勒保自新城分兵。進攻諸要隘。皆克。時又有下札寨武生陳啓麟者。其父母親族四十四人。皆爲所殺。啓麟痛憤。集義勇得千人。營于硬溪孔。以擊苗。已而義勇多至三千餘人。乃分營二。一營硬溪孔。一營尖山之朗打寨。自簡精銳。扼興隆山。

爲犄角勢。自正月至六月。與苗五十五戰。啓麟念郡城被圍久。轉戰至于郡城下者三。冀解郡城圍。斬苗四十有九。斬苗目十有五。擒苗一百八十有七。擒苗目二十有五。獲烏機礮三。械千。得殺父母苗。斬以祭。至是聞勒保率大兵至。與武生桑揆等。圖郡境四鄉險要。進之勒保。勒保喜。皆予六品官。令從勦。六月。勒保率大兵。遂進克郡之卡子河。擒逆首老卜厭。卡子河之戰。郡人千總李上林。奪隘先進。苗遂驚潰。郡兵張世鳳。助攻克阿棒。魯溝。卡子河。戰最力。初八日。遊擊常山。率援郡城兵。自水倒流。趨馬鞭田。至馬別河。橋燬。無舟可濟。乃營于岸左山巔。逆苗韋阿信。聞而與黃草壩苗合。夾攻之。官兵敗。常山與普安州判丁楷。把總陳宏典。外委張世溥。皆死之。軍士殲焉。宏典。士溥。皆郡人也。援兵覆沒。苗攻郡城益急。金淳與楊文海等。露宿城

上。晝夜防守。屢出奇兵。擊却之。十三日。勒保命總兵張玉龍。由卡子河後。取道趨郡城。而已率副將施縉。趨普坪。分道伏箐中。苗數千。忽自山馳而下。截我軍後。伏發。我軍反攻。苗腹背受敵。不能支。遂殲之。十九日。至壩弄。苗悉衆來拒。張玉龍兵亦至。出苗後。又夾擊。大破之。焚柵數十。苗遁還城下。燬五洞橋。二十一日。大兵至五洞橋。橋燬。勒保命大兵。于橋側。燃大礮擊苗。而于水淺處潛濟。遂至郡城下。金淳與楊文海。知大兵至。令城中兵勇。奮力出合擊。無不一當百。苗大潰。生擒王阿報。勒保入城。以捷聞。請勦餘孽。報可。是月。純皇帝以永豐冊。亨捧鮓三處。與廣西交界。命兩廣總督吉慶。自廣西之西隆州渡江。圍擊永豐冊。亨捧鮓。又以黃草壩。與雲南交界。命雲南巡撫江蘭。與總兵德英額。率兵協勦黃草壩。苗。時總兵書麟。

副將康世貴已率兵取道播西。至永豐州之百層。副將王格知州程卓梁已率兵取道播東。由永豐州之高坎河石坪者坪。至龍渡會兵。閏六月。勒保用以狎制狎之策。出北鄉土目賀占鼇于獄。令督東鄉土目王英。西鄉土目王文亮。南鄉土目楊遇洪。率義勇攻勦各鄉逆苗。所至有功。又簡任郡人。勦撫並用。于是郡人陳啓麟。爲招降東北二鄉苗。凡一百四十餘寨。又以郡城雖圍解。逆首梁阿戴。王囊仙。韋朝元。李阿六等。尙分竄永豐。册亨。黃草壩。捧鮓。諸處。乃分兵攻勦。七月。勒保命翼長常明。率兵趨解黃草壩。捧鮓圍。滇撫江蘭。命總兵德英額。率兵助之。于是郡人武舉人劉君成。劉德達。外委張定邦。與陳啓麟等。從常明。共攻苗于九頭山。至鄭屯。宵攻馬別河苗。啓麟督造河橋。濟師。遂至黃草壩。解其圍。八月。張定邦又從常明。自魯布革進

攻。與劉君成等。解捧鮓圍。郡人把總保元龍。從德英額。攻苗于江底汛。元龍力戰于金雞山。擒苗目二。又攻硝洞。傷左手及股。又至江底河。奪苗舟一。進攻糯米寨。傷左股。負傷。進解捧鮓圍。又攻苗于挖鼠黑。勝之。八月十五日。勒保率翼長常明。副將施縉。勦南鄉苗。攻逆首王囊仙。七絡鬚。于洞灑塘。當丈山。囊仙七絡鬚就擒。再攻九頭山。克之。洞灑當丈之戰。勒保親督戰。郡人藍翎六品官保元鳳。首攻洞灑苗城。中火鎗死。其兄保元龍。力戰。傷右肋。勒保督陳啓麟等。冒死再銳攻。乃克之。郡人有功者。陳啓麟。擒七絡鬚之妻賀氏。及姪韋成明。僞軍師桑洪升。及段士明家屬二十二。人。降苗一千二百餘人。馬韜。與張定邦。劉紫玉。共擒王囊仙。張定邦又與劉紫玉。及外委楊國仁。武生孫敏。鄉勇保之琳。共擒七絡鬚。之琳傷額及手。外委劉紫紱。手

斬苗四。武舉人劉德達擒苗目韋博流、韋抱利，手斬苗十有二。郡兵張世鳳尤多斬獲。又攻補路諸處。張定邦與劉紫玉共擒逆首王阿岑。劉君用焚補路寨，擒苗二十有三，獲大礮三、械百，傷左眼及手。又勦北鄉逆苗。張定邦由羊場進攻巴林，入逆首王抱羊巢，凡九戰。馬韜擒抱羊。劉德達助擒，手斬苗二。進攻樓下河，馬韜與定邦共擒西路王陽明。韜又擒僞大將軍楊成玉等。劉德達攻額老、保洞、樓下河，皆有功。又攻克馬乃營，擒逆首王阿金等十八人。張世鳳助擒阿金。定邦又攻樓下馬乃、鍋背、松林、紅巖，皆有功。又攻苗于北哨，凡三戰。復由豈巴攻北哨，焚之。苗衆殲焉。陳啓麟攻洪囂寨，擒逆首大王公之子王豹、姪王阿二、僞駙馬韋正容、僞欽差韋六保、韋光仙、韋阿二等。斬苗千有奇。又自新城馬乃進攻花江，造舟濟師。已而兩廣總督

吉慶。自西隆進兵克亞稿。苗之蔓延于廣西者悉平。滇撫江蘭與總兵德英額進解普安縣圍。二十七日。總兵書麟解永豐州圍。二十八日。翼長常明率劉德達、劉紫玉等。副將施縉率張定邦等。轉戰至永豐州城。二十九日。勒保率大兵入州城。九月。勒保率劉德達等戰復册亨城。旋勒保、吉慶、江蘭、書麟皆至郡城。勒保又撫定回龍廠。阿計屯諸苗。苗平。于是勒保命檻送逆首王囊仙、僞大王七綵鬚、僞軍師桑洪升、僞將軍王顯明等。入都獻俘。盡磔之。洪升，漢人。郡生員也。是月勒保凱旋。至于貴陽。乃銷所獲兵仗。爲鐵柱于甲秀樓。是役也。郡城官紳士民戰守咸力。職官守城者。則有署經歷事金淳。竭盡忠蓋。凡死手六閱月。而援兵始至。城卒保全。淳，錢塘人。時以亦資孔驛丞。署經歷事。敘功。升平遠州知州。後署大定府事。卒。教授白象乾訓導。

吳永輔敘功。並升知縣。把總楊文海。升手備。其子生員楊國珍。予六品銜。後官錦屏訓導卒。此外郡人。平苗有功者。千總馬韜。升遊擊。

賜花翎。後官至副將。征趙金龍殉難。土目賀占鼈。予四品銜。

賜花翎。武生陳啓麟。予五品銜。

賜花翎。千總李上林。升都司。武舉人劉君成。劉君瑞。並升守備。劉德達。授把總。後官至都司。把總保元龍。升千總。後官至都司。外委張定邦。升把總。後官至遊擊。楊國仁。升千總。

錫藍翎。後官都司。劉紫紱。升把總。後官副將。劉紫玉。升守備。後官叅將。武生孫敏。授千總。

予藍翎。後官都司。李士龍。授千總。鄉勇保之琳。予六品銜。後官總兵。郡兵張世鳳。授把總。後官遊擊。其擊苗陣亡者。則有守備李錦。把總陳宏典。張士溥。李春敖。李華純。保元鳳。胡慶遠。張升。皆

賜祀昭忠祠。其士民義勇。起義死難。而有姓名可考者。則有貢生李萃中。周禮官。周正通。生員景翼。尙濬。尙治。尙炯。尙玉潤。劉光祖。周讓。周諫。周謙。周誠。周謐。周誠。周詢。周誦。周詠。周紹文。譚明忠。李士英。趙旭旦。胡純陽。劉純武。劉克恭。劉克寬。韋雲階。孫中行。孫祥徵。楊禮官。劉鶴鳴。劉方儒。李有恒。沈啓明。陳昇。陳昭。楊國瑞。武生劉光覺。周瑛。周誥。周謨。周敷文。李士瑞。趙旭昌。孫祥麟。夏廷舉。義勇羅天申。羅定

倫、張鈺、毛天佑、趙天申、許升等。都計一千三百八十一人。並

賜祀忠義祠。其時紳士巡營。則有周文龍、張應吉、趙申、公局支發。則有舉人王秉心、唐士元、拔貢生李瓊英。傾家召募者。則有郡民郭懷仁。捐金助守者。則有武舉人王亨第、劉君用。郡民曾鳳麟。出粟餉兵者。則有生員譚明禮、夏澤先、夏廣禮、鍾彝孝、黃會雲、胡尙榮、蕭克達、史萬全、李芳、王向方、桑揆、陳祝先、王亨峻、張連芳、何承麟、王永乾、黃桂攀、王亨偉、武生景泰颺、張維世、張世功。及郡民史之傑等。凡五十九人。以山木供薪者。則有生員周琛、督率義勇者。則有貢生黃健、景雯、景震、邢思孔、生員夏承道、夏元範、張敏文、張敏行、葉鳴玉、夏元直、劉德彬、武生夏承欽、鄉約周正官、陳沛、張書紳、監生夏承恩、黃金魁、李榮、吏員桑鴻照、郡民郭居仁等。凡三十九人。義勇之有功者。則有

興義府志

卷四十六

本末

二十九

貴陽文通書局代印

傅松、王謝、金榮、伍國剛、楊順之、錢鴻品、傅天羅、鄧良德、丁茂占、夏元珍、唐肇基、朱三、朱四、彭有貴、尹綱目、白正林、鄧元會、鍾盈、涂亮、余亮等。獻俘京師。以通苗語傳譯者。則有柯應春。皆獎敘。舉人王秉心、生員周琛、譚明禮等。

賜官通判。武生夏承欽、郡民懷仁等。皆予六品銜。捷聞。奉

旨蠲賦一年。資兵一月餉。

賜改南籠府。爲興義府。

御製詩褒美之。中有句云。一戰克關嶺。大路得通走。繼解新城圍。遂克卡子口。獲賊老卜厭。是爲賊臂手。旋由普坪進。數千賊拒守。兵分兩路攻。繞道渡河隄。雄兵似天降。直抵南籠赴。立解半載圍。萬戶歡

聲吼。飛章報捷來。吳貺謝稽首。總統善用兵。將佐均英偶。故迅解城圍。守者勞非苟。細披疾苦狀。惻然動心忸。吏民胥合旌。次第旋恩厚。更與錫府名。興義新額茂。

御注云。南籠圍解。守城官民歡躍出迎。衆約數萬。內有署經歷金淳。把總楊文海。率領兵民同心固守。因日久糧食殆盡。有生員譚明禮等。出米穀銀兩等。陸續接濟。又有舉人王秉心等。召募義勇。晝夜登城環禦。又城中柴盡。有生員周琛。家有樹園。盡伐以供爨。然以被圍半載。情狀殊形疲憊。披覽勒保奏章。爲之心惻。該處文武紳士。各効勤勞。實堪嘉獎。特加恩分別升授。并蠲免一年租稅。令該督撫加意賑卹。兵丁普賞一月錢糧。俾得均沾實惠。戊申歲。平定臺灣。以諸羅縣民固守。改縣名爲嘉義。今倣其例。改南籠爲興義府。以示彰善。

興義府志

卷四十六

本末

三十

貴陽文通書局代印

之風。撰補

按郡之父老相傳。嘉慶元年。郡有一道人。左手執餅。右手插釘。呼于路曰。餓死。痛死。人皆異之。嗤其執餅不食而呼飢。何不去釘而自苦。明年苗變。民多爲苗殺。城被圍久。民多飢死。始悟餅釘者。隱丙丁也。元年丙辰兆禍。二年丁巳變起。民乃死于苗。死于飢也。又言苗圍城時。大王公攻城。爲楊文海燃大礮擊死。後金淳擒苗訊俘。則云。大王公方攻城。忽見城西有神人。揮刀斬大王公。乃死。城西有漢壽亭侯廟。人咸疑爲神助。此二事。近于語怪語神。故削不載。僅附識于此。至狛苗初圍城時。卽索曾虐苗之府役。則致變有由。安順志云。南籠狛苗。性愚而獷。受杯酒。願効死。工作悉取給漢人。漢人居其地者。率誘奪其利。訟于官。多不得直。狛苗佃漢人田。

租入如期。不敢少升合。漢人于額租外。多索酒食。不敢校。有貸漢人貲者。雖銖兩。數年後。至千百。不能償。漢人拘辱之。苗日尤橫虐。役苗甚于奴。負販皆有稅。一宴各。卽科派苗寨。苗有美田宅。輒奪之。兵役入苗寨。恣需索。苗以官奉之。道偶有僵戶。累及數十寨。苗少饒裕者。產立破。苗不知典禮。衣物稍新異。兵役輒指爲違制。必賄而後免。王囊仙因詐言天將滅漢人。并滅苗日兵役。苗久苦橫虐。翕然從之。遂反。又伏讀

純皇帝御製南籠圍解詩註云。前者楚苗滋擾時。卽以仇殺客民。奪回侵占之言。藉詞煽惑。遂降旨詢問。果有郡縣左袒百姓。苦累苗人。或役使不給僱值。或任聽客民盤剝。不爲公剖。以致激而生變之語。因嚴飭該督撫等。于善後章程內。畫清疆界。設立苗弁。俾

苗民各安生業。永斷葛藤。因思黔省狝苗。無端構釁。或亦有湖南三廳之左袒百姓。苦累苗人之語。此二事。均俟大功告竣。當諭令各督撫。據實查究。并于善後事宜妥辦。大哉王言。誠恐苗之致變有由也。至逆苗揮扇可以禦礮之說。雖三尺童子。應皆嗤其妄。而羣苗乃信之。此其所以爲愚獷之狝苗也。識略已深慨之矣。

嘉慶平永豐州苗改名貞豐州本末

乾隆六十年。二月十九日。永豐州南門火。焚城中民居。七百餘家。死者數千人。火災後。狝苗揚言。將棄田不耕。明年。爲嘉慶元年。狝苗竟皆棄田不耕。州城形勢。城居亂山中。凡門三。有南東西三門。無北門。城之後。環踞山上。極高峻。城險可守。惟城中少泉。知州明安奉。蒙古

人知狝苗將爲變。乃命州人捐白金二百。晝伴修城。夜則潛于西門外。鑿渠引水入城。工甫竣。而狝苗變起。二年正月初五日。南籠府之狝苗先起事。圍郡城。卽分掠大栗樹。州苗應之。是日州苗卽圍攻州轄之册亨城。州同曾艾與把總楊烈外委梁國璋堅守。苗焚掠入州之西境。西境民逃入州城告變。明安泰于初六日亥刻聞警。卽集官紳士民。語之曰。今日無分士庶。皆

聖主臣也。其何以保城。生全萬姓。幸教我。語畢。泣下。衆不能仰視。已而與衆共爲條教。區畫城守事宜。時州城兵將多調征銅仁苗。城中僅守備江濤把總宋成貴等協守。明安泰以城中兵寡。乃命州役助守。部署定。初七日。命宋成貴率兵出城巡哨。是日。者黨諸處漢民悉避難入城。納之。初八日。明安泰令民登城。助兵役分堞守。又捐金。召

募義勇助守。酉刻。成貴自者黨飛騎回。告明安泰。巡哨至者黨。苗已焚殺花障寨民。趨者黨。與遇。以兵寡。不敢輕戰。走登者黨山巔望之。苗已又焚者黨。趨州城矣。明安泰令閉城嚴守。初九日。馳使飛聞大吏。是日午刻。有上者黨之士。曰黃峰。與岑際景及漢奸王阿六來詐降。明安泰囚死之。檄調州屬八甲土目。率土兵助守城。旣而八甲苗民徒手至。僉曰。僅可助守。不知進戰。明安泰疑之。撤回。令分守八甲地。十四日。檄魯貢亭土目黃如章。把事蒙天錫。及西門把事羅啓先等。授以防守策。令助守。又兵近城四亭苗民。巡哨守卡。是日。頂岡亭土目黃澄清。擒逆苗楊卜番至。訊知乃秘革亭之苗王卜利。修逆書。令卜番齎書。約府屬逆苗。同攻州城。明安泰卽命秘革亭土目監生黃天升。擒王卜利。飛稟大吏。請兵剿逆。十六日。天升擒卜利。及其家

口至。悉囚死之。十八日，逆苗焚殺百層亭民。十九日，明安泰又令宋成鳳、齋稟馳請大吏援兵。二十日、二十一日，羣鴉聚空，繞城哀鳴。天色慘暗。逆苗數萬，至那山場焚殺。那山場距城僅十五里。城中遙見火光。人心惶懼。是夜二更，苗由坡西寨，坡烘寨，執炬來焚西教場及新瓦場。民房城中靜守不動。焚至舊瓦場。城上始吶喊。發鎗礮。逆苗亦吶喊跳舞。近城各苗寨寂然無聲。不知所之。四更，逆苗始退。明安泰使役王洪等潛出東門。馳趣大吏援兵。率衆嚴守達旦。二十二日。黎明後。賊攻西門。城上屢發鎗礮。不能傷一苗。知爲邪術厭。用穢物污鎗礮。再發之。亦無效。衆惶遽無措。明安泰乃步禱于漢壽亭侯廟。南將軍廟。城隍廟。免冠蓬首。首觸至地。已刻。苗又攻城。明安泰以黑犬血塗礮子。乃礮傷苗。苗退而分營于新瓦窯及田壩。又毀演武廳。

及民居。東營于黃土坡。南營于孤老院。旋苗二三千圍城。明安泰嚴守。二十三日，苗攻東西二門。守者與敵互有殺傷。苗分黨焚掠頂岡巖益諸寨。斷我東門大道。是夜重嘗募回民馬高。齋文縋城出。趣大吏速援。二十四日，令兵勇縋城。焚近城民居。不使苗匿其中。放鎗礮攻城。二十五日，苗攻西城。入夜危甚。忽雷電。大風雨。且巨雹下。苗始退。二十七日，已刻。苗攻西城。甚銳。城上軍民怒。躍下數十人。擊之。東城南城軍民亦如之。苗披靡。追斬百餘人。焚苗數營。生擒苗一。獲糧械無算。苗首尾不相顧。我兵歸。將入城門。苗忽蠶至爭門。鎗礮矢石飛至城上如雨。我兵不及施鎗礮。急飛石與敵。苗傷始退。旋一逆苗衣白仗劍。噴法水。冒鋒來。面城樓。誦咒作術。鎗礮不能傷。移時。回兵。李生榮。挽強弓射之。中額。苗拔箭。俄火鎗又中其腿。始仆。久之死。三

十日聞提標叅將鄒寬率兵至州轄之者相亭駐營。二月初一日、初二日、羣鴉哀鳴。天色慘暗。初三日、定頭難民劉學楷逃入城。始知州轄之定頭城陷。闔城屠害。初四日、苗焚殺回龍廠。卽今改隸府之水銀廠是也。初六日、馬高齋文回城。初八日、苗徧掘漢民墓。初九日夜、萬火如螢。逆苗蟻聚。初十日、苗分五隊、用擋牌進攻西城。牌長丈餘、用大竹織摺、下藏長梯。每牌以三十餘苗、負至城下、蔽以攻。梯以登。西城樓左、急發礮擊之。右礮臺亦發礮。苗傷。旋又鎗礮齊發。苗傷者多。始棄牌走。兵勇下城。得牌視之。牌內皆藏綿被。以禦鎗礮。十一日、苗攻南城。飛石入城如雨。近城屋皆損。我兵發鎗礮。苗傷而退。十三日、命鄉勇出城。伐盡南門外。近城藏苗竹木。又焚東門外新寨。十五日、又命出城。毀遮鎗礮之民牆。苗出營。遙發火鎗。我兵銳進。苗遁。進

焚苗營三。又焚教場壩、坡羊、龍井、黃土坡者。馬、豈年、祥旺、諸苗寨。奪獲大木礮一、長丈餘。五子礮一。攻城梯三十有奇。牛馬糧械無算。生擒苗二。斬之。苗自此始散去。十七日、有人報黃土坡林中藏大木礮一。命兵勇二百出城取之。實無礮。至南門外與苗遇。擊走之。追至坡西。乘勝焚坡烘、坡西、石頭、香奈、些七、諸苗寨。十八日、巖益寨漢奸四人來詐降。訊得情。斬之。十九日、頂岡、偏岡諸苗樹降旗于東門外。西刻、秘革、亭漢奸三人來投。賞齋之。畱一人爲質。旋知是計。斬之。二十日、苗三百有奇。自教場壩至。攻西城。其鎗礮鉛子。自舊罐窰打入城。如驟雨。明安泰令兵勇出敵。戰至日中。提標叅將鄒寬援兵至。寬率定廣守備張文貴、大定守備周斌、武舉人段自成、把總王舉等統兵五百。隨營難民四百有奇。自者相取道蘿蔔寨。尖坡之小路由教場

壩入城。于是人心始定。二十一日，明安泰以逆苗之在東北攻城者，多以珉球石爲蔽。城中鎗礮不能及，而守者多被傷。又懼隨營難民入城有變，乃命隨營難民營于珉球石之屯上，倚城東北礮臺下。壘石爲城，名之曰難民城。與州城爲犄角勢。是日申刻，頂岡巖益苗數人來降，賞齎之，令歸。繳獻糧械戶口冊，去不反。斬其質。二十二日，令鄒寬之運糧苗夫出城。二十三日，本營守備江濤率兵勇出西門，伐樹建難民城。苗自黃土坡大至，濤被圍。鄒寬按兵不出。明安泰率義勇出援，以大義激大定守備周斌，率兵助戰，圍始解。是夜，頂岡苗蕭大年等樹降旗，密告逆苗定謀，以寅午辰戌日攻城。後果如期，得預爲備。二十五日，一兵逃至，始知是月二十一日，州轄之冊亨城陷。州同曾艾把總楊烈，外委梁國璋死之。初，苗于正月初五日圍冊亨城。

冊亨城中兵不滿二百。曾艾激厲士民，與楊烈、梁國璋死守，令民壯者登陴助守。老弱饋食。苗攻城，守者下木石斃之。苗懼，乃圍而不攻。城中出樵汲者殺之。艾遣監生劉裕元、耆民楊定邦與王天佑、廖僕楊佑、縋城突圍出，間道告急于督撫。趣援兵于近營，皆道梗不達。守四十日，援絕糧絕。艾聞一富民尙贏粟，斬出餉守者。艾召諭之曰：爾贏粟守者皆飢，飢者知大義，不敢不守。脫以飢對敵而城陷，爾能保爾粟不爲苗掠乎？爾能保爾命不爲苗殺乎？爾出爾粟以餉守者，守者飽能戰守，城不陷。大軍至，圍解。爾不過失爾粟而保爾命，且有義名，不愈于吝粟而自禍乎？且諸義士感爾出粟爲爾保餘粟，而不爲土寇掠，不亦善乎？富民感泣，盡輸粟于官。艾令守者日五合。老弱日二合。三日糧又絕，掘草根食。死者枕籍。又數日，守者皆僵臥。苗望城

中三日無炊煙。乃築土城以登。守者不能起。城陷。楊烈、楊國璋戰死。艾猶欲率左右巷戰。弗克。艾拔劍獨迎戰。手刃一驍勇苗。提首反。既而苗大至。遂被害。一家四十餘人皆死之。族人曾某、僕鄒某共匿艾尸。負艾幼子逃。至郊。苗環攻。曾某善棍。令鄒某負艾子。倚背護子而敵苗。擊數十苗斃。餘苗不敢近。突圍出。後事平。艾與楊烈、梁國璋之子皆

予雲騎尉世職。明安泰聞冊亨之陷也。愈戒嚴。命兵勇出城掘濠。二十八日濠成。二十九日羣鴉又哀鳴。巳刻苗自者黨至西門外。營于三凸橋之田中。人心惶亂。是時斗米銀三錢。斤鹽銀五錢。明安泰發倉粟賑飢。三十日又命富民平糶。是月巡撫馮光熊率兵至安順。頓兵不進。三月初一日南城崩。命兵勇出城護築。苗營于坡羊龍井山

上突衝者再。我兵多傷。鄒寬始發兵救援。初二日苗挾州之孔場洞生員曾大經、曾大儒兄弟至。賺城以二人之兄大綸爲城中總管。苗語二人曰。從我計賺城。從則生。不從則孥戮汝。二人佯諾之。至城則大呼曰。勿啓門。我曾大經曾大儒也。逆苗挾我賺城。逆首王阿保率衆卽至矣。努力堅守城。苗怒醢之。俄逆苗王阿保率衆大至。攻西南二門。東門苗登黃土坡觀戰。至午城中發礮傷苗。始退。申刻獄變。斬盜犯十餘人。乃定。時有州之把蘭村人林明者。聞苗變。卽馳詣城中。請與于戰守。與州人薛應元、樂美成皆善火鎗。苗攻城。三人發鎗。必中其渠魁。官紳神其技。號爲神鎗手。初三日兵勇出戰。焚苗營。初六日明安泰以南門外有突起之土阜。苗據以攻城。守者多傷。及城中發礮。苗恃阜爲障蔽。礮不能傷。乃定計于南門外建礮樓。分難民守

之。使苗不得登土阜。初六日，命兵勇出城。伐建礮樓木。是日，有阿落田苗四人來降。縱一苗去。久之不歸。斬三苗。初七日，又設法。添引西門外井泉入城。初八日，守備張文貴率兵勇焚阿落田，熊井各苗寨。初十日，礮樓成。命難民分爲二營。一營礮樓，護守南門月城。一仍營難民城，護守東門礮臺月城。十一日，伐木修三門城樓。十五日，把蘭亭土目黃岐被圍于梯子巖。馳使乞援。十九日，有黃相魁等五人自冷水河來投。二十二日，王母六亭總土目王居仁、長壩六亭總土目王際盛遣使稟報云：居仁與弟崇仁捐白金三千兩、米三千石，聚族人難民。在王母亭起義禦苗，築土城以守。崇仁與族人好仁、文彬率衆防禦雙江口。懷仁、興仁率遊兵隨處應援。王際盛與其弟際昌、際和、際中、際成于長壩起義禦苗。居仁與之合兵，互相應援。禦苗屢勝。

苗弗敢侵其境。其地安堵。經大吏賞功予官。二十四日，修城樓竟。二十五日，東西二門外，苗殺樵采民趙貴、任老三等四人。二十六日，苗登坡羊山巔，執樵采民首，望城中詈罵。明安泰巡城，鄒寬不出。二十七日，西城崩，令兵勇出城衛築。巳刻，苗由偏岡過黃土坡，至那山大路。往來猖獗。兵勇擊之，斬數級。明安泰與鄒寬嚴守達旦。四月初一日，後山守城民出樵采，擒苗婦一。初二日，苗伐教場壩杉樹。初三日，這愛箐難民來奔。初四日，苗至洗布河攻城。鎗子如雨，入城傷人。外委孫偉守城。鎗子中其帶鈎，驚仆。久之始蘇。明安泰仍命以黑犬血塗礮子，燃礮擊之。苗傷始退。初五日，梯子巖黃岐遣使運煤，以濟城中。是日，明安泰命大定兵匠造大礮，不成。初六日，初七日，聞西北方礮聲遠震。初九日，鄒寬令所部兵將出城巡哨，探大兵消息。至蜂蜜

寨。遇偏岡苗陸阿埃率衆至。與戰。城中遙見火鎗煙起。明安泰恐我兵有失。隨率義勇請鄒寬助兵出援。數請不應。旋我兵退下那山。寬始令定廣守備張文貴。大定守備周斌。定廣把總王舉。大定武舉人段自成等。率所部兵。偕州城義勇。登那山迎戰。寬又令開西門。自出接應督戰。迨張文貴周斌等。率前軍至山梁。焚些七。蜂密。戈然。坡愛。白蠟旗等寨。又由北路之坡板等地焚殺。又繞道至祥旺山後。與苗力戰。時寬已撤後軍。先回。文貴等。乃率兵由些羊田壩之小路退回。田間多水。陷淤淖中。苗三面夾攻。援兵不至。文貴與周斌。王舉。段自成。皆戰死。苗追我兵至洗布河。城上發鎗礮。始退。敗兵入城。闔城驚慟。是役也。失大礮二。火鎗數十。陣亡兵勇數十人。鄒寬默然。是夜大雨。明安泰令難民冒雨出。求得文貴等尸。哭奠葬之。厚賞求尸者。十

二日。苗聚黃土坡。難民城中發鎗礮。苗傷。始去。十六日。苗聚東門。以奪去大礮攻城。一白旗隊苗。潛上後坡煙山上。發火鎗。飛石入城。傷人。城兵與敵至日中。城中增兵勇上城。鎗矢如雨。苗傷遁。十八日。復命宋啓鳳。張老三。僞爲苗狀。齎文赴新城趣援。二十日。苗千餘。由那山至瓦罐寨後。吶喊施礮。又東門苗。至黃土坡。洗布河。南至望城坡。三面攻城。瓦罐寨後之苗。各以一二百人聚一處。忽分三四十人爲一隊。爲首者白巾白衣。執白旗一。餘賊負長梯二。冒鎗矢。至西南城濠。怒目視城上。城上矢石如雨。竟不能傷一苗。移時。火鎗中二苗。始棄梯走。餘苗伏瓦罐寨後亂石中。亦遁。本城守備江濤。于西門敵苗。中苗火鎗。傷左足。二十二日。苗登望城坡。窺城中虛實。二十三日。秘革亭苗黃天眷。來詐降。斬之。二十四日。苗登黃土坡。放鎗攻城。未刻。

王母六亭總土目王居仁使人稟報王君輔陣亡。二十七日苗至洗布河。城兵陸成貴見苗擡礮至。躍下城奪礮中火鎗死。二十九日頂岡亭土目黃進逃入城。是月斗米銀五錢。斤鹽銀二兩。鹽不可得。和水以市。五月初三日苗三四百。由那山場至西門外瓦廠上。施邪術。作狎俗之迷蠟鬼。不成。逡巡去。初五日苗至黃土坡。放鎗攻城者三。初六日使往新城趣援之張老三回。始知勒保大兵已至新城。張老三與宋啓鳳歸途遇苗盤詰。失啓鳳不知所之。初十日復使回民馬高王學赴新城趣援。十五日令些愛等逃來之宋鐵匠復造大礮。二十五日南城義勇擒老苗梁卜閏。二十八日大礮成。礮子大如雞卵。明安泰斬梁卜閏以祭礮。二十九日擒苗羅卜章。臠割之。是月斗米銀五錢有奇。斤鹽銀三兩有奇。樹伐盡。木器代薪。樹葉代菸。是月

純皇帝已又命兩廣總督吉慶率粵兵由西隆州入境。普洱總兵書麟率兵自歸化廳趨州。與勒保會兵攻勦。而州城未之知也。六月初一日申刻苗追殺樵采民。至瓦罐窯。難民城中出救。苗放號鎗。偏岡苗三十餘人。執白旗。飛奔黃土坡。至洗布河。與難民戰。戰至初更後始退。初三日馬高自新城齋文回。明安泰予之頂戴。初五日苗至瓦罐窯。放火鎗攻城。鎗子入城傷人。初七日演放新造大礮。十三日又使王登魁等赴新城趣援。十八日使把事陸貴榮往王母亭探兵。十九日田文昌等自新城齋文歸。是日苗又至瓦罐窯。西城鄉勇與難民城難民出合擊。苗佯敗走。追里許。頃之苗復至田壩與戰。偏岡苗數人執白旗一。驟至。戰久之。明安泰鳴金撤鄉勇入城。苗進攻。城上發新造大礮擊之。自未至申。發礮不絕。苗始潰。二十一日又使田文

昌、齋文赴新城趣援。二十二日，接安順軍需局檄二發軍械火藥糧餉。接濟州城。始知總兵書麟與丹江通判程卓梁已定各率兵分道入州境。至龍渡會兵。進援州城。戌刻，王母六亭總土目王居仁使人齋稟至。告軍情。二十四日，苗遷蛇場于巖益坪。趕場苗約四五百。午後，苗追殺樵采者。旋至東門外。掠一難民兒去。二十五日，苗掠樵采女三。越三日，放一女歸。徧體刀傷。言二女受辱狀甚慘。二十七日，苗伏西門外。放牛誘敵。二十九日，梯子巖有謝姓者。偕數人來城。貨菸鹽及乾肉。始知十八日，大兵已援南籠。午刻，苗自偏岡至西門外。設伏。放火鎗攻城。未刻，大雨。申刻，苗猶冒雨。放火鎗攻城者再。是月，斗米銀六錢。斤鹽銀三兩二錢。購鹽水都不可得。人心惶亂。是時總兵書麟副將康世貴率兵取道播西。已至州轄之百層亭。副將王格知

州程卓梁已率兵取道播東。由州轄之高坎河、石屯者坪。至于龍渡。會兵。進攻魯貢、坡要嶺、巧雲寨。皆平之。糧乏。卓梁使人由羅斛通運道。至王母亭。兵食以濟。閏六月初一日，豈結黃鳳池自安南投文歸。齋到軍需局。吳某行知。代州轉稟大吏。已奉批回。辰刻，後山城崩。急命兵勇衛築。申刻，苗至黃土坡。殺樵采難民。擒城中任鐵匠去。初四日，賊至洗布河。放火鎗攻城。初五日，任鐵匠逃歸。苗追至城下。初九日，城民集衆出西門。伐趙家屯樹爲薪。被苗遂回。十五日，明安泰以焦勞成疾。衆爲祈禱。午後，苗放火鎗攻城。十六日，營兵趙木匠自新城大營奉使。取道梯子巖。至州城。是夜，守城民與難民出城盜苗牛三。濟飢。十七日，黎明，苗追跡牛。至西門外。是夜，兵勇潛出南門。勦苗寨一。擒苗二。十八日，使人赴府城請援。是夜，頂岡諸處苗宵聚。至洗

布河、教場壩、黃土坡、諸處放火鎗。似將乘夜攻城。四更始散。城上發鎗礮。嚴守達旦。二十日、投文兵。被苗遂回。乃別選人齎往。是夜、難民潛出。勦核桃樹諸苗寨。二十一日、苗至洗布河。放火鎗。二十三日、苗又至洗布河。放火鎗。至午刻、苗大呼講和。許之。命棄械至城下。俄苗三。棄械至。自陳願和。明安泰發朱筆諭帖。命各苗寨老成把事七八人。次日入城。再議。苗諾而去。二十四日、苗殺樵采三人于放牛坪。二十五日、苗集豬場。難民熊朝英赴場。苗掠其貨。囚之。旋予之酒食。縱歸。告以次日來降。并餽鹽于通苗州役三人。未刻、苗掠難民六。殺四人。有一婦與夫弟。素與苗善。苗憐之。居之空屋中。入夜、潛聞苗私議詐降計。逃歸以告安泰。二十七日、苗至東門橋。放火鎗。呼城中人與語。城上不應。命苗首自來。頃之。有十餘苗。至東門外數武。令苗三登

梯乘堙。與城中苗生陸貴堂議。約次日來降。二十八日、午刻、苗至西南二門。放火鎗。東門苗。伏于黃土坡。呼州役徐升。與語。升不出。未刻、驟風雨。苗散去。是月、斗米、銀九錢。富食粥。貧食糠。民有去志。七月初一日、王母六亭總土目王居仁。使人齎稟告軍情。初二日、頂岡亭土目黃信。逃入城。告苗定詐降計。欲誘城中人出樵采。趕場。截而殺之。初三日、有些結寨順苗。以菸來市。始知勒保大兵。已至巴林。是日、使人探兵。初四日、苗知計露。殺樵采民十餘人于黃土坡。初九日、苗至西門外。放火鎗。十五日、城中饑迫。兵勇百餘人。潛出城。剿阿羅等苗。擒苗婦二。充食。至雷打巖。被苗截去兵一。鄉勇五。十六日、闔城居民。出城采野稗充饑。被苗掠去民二。漢壽亭侯廟僧一。二十日、苗又追殺采稗民。午後、苗執白旗二。約二三十人。攻西門。居民義勇。皆在城

外采稗。與苗戰。至申刻。城中發礮傷苗。始退。二十一日。斬賊四。飢民分食之。二十二日。苗追殺采稗民至東門。二十五日。兵勇出城采稗。與苗戰于西門外。陣亡兵勇六。苗追近濠。城上發鎗礮。苗退。是月。斗米銀一兩六錢。斤菸銀一兩。民以野稗人肉充食。軍民無措。頂岡苗徙登山巔。構篷屋以居。明安泰命神鎗手林明。再趣大軍急援。明縋城突圍出。道遇苗大至。明伏水中免。馳一晝夜。而與翼長常明軍遇。常明嘉之。欲奏官。明辭。使守糧臺。苗來攻。明施火鎗盡斃之。予之金。以酬厥功。亦辭。八月初一日。苗至黃土坡。放火鎗。初三日。順苗以牛來市。始知頂岡偏岡諸逆苗。約北鄉諸苗。定計于初六日。以所掠軍營大礮攻城。初六日。苗果大至。分隊三。隊約千餘人。以大礮三。一置舊瓦窯之田中。攻西門。一置洗布河。攻城東北。一置坡羊山坳。攻城

西南。其聲震天。礮子大者重一斤。小者重五兩。飛入城如雨。兵民皆逃匿。共燃發數十礮乃止。苗之三大礮。其九節礮尤猛烈。城上見苗初燃火發礮。苗自震死數人。礮子飛至州署側。古厚朴樹後石上。樹斷兩枝。石爲兩破。明安泰旋使人登城。曰。礮猛甚。幸苗未知填滿火藥耳。脫藥滿。城危矣。苗聞之。次日。填藥滿。燃礮。礮脹裂。死數苗。苗乃不敢發礮。初九日。把蘭及上者黨之苗。毛羽。黃士明。王才。來投。明安泰予頂戴。命招降諸苗。初十日。苗掠樵采民三。十四日。頂岡諸處苗集數百。又以大礮五。攻東西二門。自辰至未。礮聲不絕。俄苗潛從後山襲城。兵勇禦之。矢石如雨。苗傷乃退。二十日。申刻。苗執白旗一。率數十苗。至教場壩。殺樵采民五。二十三日。順苗自魯貢齋文至。始知副將王格。知州程卓梁。率南路援兵。自歸化廳。取道高坎。石屯。出者

坪渡江。至龍渡。與總兵書麟。副將康世貴。兵會。已攻平魯貢諸處。同趨援州城。計二十五六日。可抵州城。約州城兵勇。尅期出城夾擊。二十五日。城中選兵勇六百。出城哨探。但遠聞礮聲。不見援兵。亦不見逆苗。二十六日。兵勇又出哨。未刻。援兵至。總兵書麟。與副將康世貴。王格。知州程卓梁等。率兵勇。裹糧轉戰至。遂解州城圍。兵勇卽于城內外駐劄。二十七日。黎明。那山場諸處。礮聲不絕。煙火迷天。旋知翼長常明。率郡之武舉人劉德達。外委劉紫玉等。副將施縉。率郡之外委張定邦等。統兵自巴林轉戰至。二十九日。大帥勒保。統大兵至。駐州署。各援兵。擒苗數千。解入城。囚之。倉獄廟宇皆滿。男苗斬。女苗釋。勒保旋率劉德達等。統兵攻册亨城。復之。餘苗皆降。勒保下命免勦苗平。遂奏捷音。勒保奏凱還貴陽。敘功。明安泰。升同知。

賜花翎。明安泰忠毅有膽識。凡守城九月。而援兵始至。城之卒保。功居首。苗平。以積勞成疾。引病去官。詣省養病。後起病。官至古州同知。卒。其餘守備江濤。升都司。

賜藍翎。陣亡守備張文貴。周斌。把總王舉。武舉人段自成。皆

予世職。

賜祀忠義祠。州紳助守者。劉在藩。張世捷。胡永和。饒懷東。江渭清。等皆

予六品銜。表其門曰。幟樹祠壇。捐金助穀有功者。亦皆保薦獎賞。土目王居仁。

予五品銜。王崇仁。

予六品銜。王懷仁。王際盛。

予八品銜。均表其門曰義勇。王氏之陣亡者。王君輔、王應安、王洪憲、

皆
賜祀忠義祠。其他士民殉難者。則有貢生陸琨、生員曾大經、曾大儒、
劉士昌、劉嗣昌、莫含英、吳學灝、楊信怡、岑國賓、岑毓賓、監生黃天申、
王洪澤、劉學龍、岑朝棟、職員王昱、州民徐智仁、土目岑標等。都計一
百七十二人。王昱、徐智仁等三十五人。

賜祀忠義祠。陸琨、曾大經、曾大儒等十五人。續

賜入祠。劉學龍等四十四人。未

賜入祠。劉士昌等六十五人。後續

旌表。建坊于册亭。又有邕皓寨女子二十三人。義不受辱。同殉難于
土地祠。以無姓氏可稽。故未

興義府志

卷四十六

本末

四十四

貴陽文通書局代印

旌表。捷聞。奉

旨。賚兵一月口糧。發銀折給。免州賦一年。又奉

旨。改永豐州爲貞豐州。以褒美之。撰補

按雷作撰貞豐守城本末。言乾隆六十年正月。先有老婦。佯狂城
中。云。苦苦。三年兩頭苦。好田無人耕。白骨不勝數。是年州城大
火。越二年。苗遂罷耕而反。又張克綸老樹歌序云。貞豐州治北。有
厚朴老樹。土人謂諸葛手植。嘉慶二年。苗圍城。勢危急。苗忽見城
東有巨人。綠袍峩冠。天神狀。苗燃大礮擊之。屹然不動。礮子反擊。
苗驚遁。城賴以保。戡定後。訊俘。乃悟巨人立處。卽老樹處也。此二
事。近于語怪。姑附識于此。至邕皓寨。苗變時。尙爲州屬之册亭轄
地。故紀其地女子殉難事。于永豐本末。今其地改爲府親轄地矣。

附文

貞豐守城本末

嘉慶貞豐州學正 雷 作 清鎮人

先是乾隆六十年正月。有一老婦。非苗非漢。高顴深目。身頽而長。伴狂城中。曰。苦苦苦。三年兩頭苦。好田無人耕。白骨不勝數。是年二月十五日。申刻。南門外民居火。南風大起。焚城中民居七百八十餘家。死者數千人。州城在亂山中。其山自南來。下注如截。間以二山。俯越一陌。又忽起一突阜。聳一大山。偏南連絡二小山。城環其上。州治在山腹。微東。此城之正南方也。突阜正對南門外。城西平田百頃。田外。即南山來脈。斜分側出。峰頭無數。自西而南而東。巉巖峻嶺。忽斷忽續。東北城環其上。城內山巔。學宮建焉。城外。即珉球石。是也。山城。頑石易崩。火災後。狃苗罷耕之謠起。元年。狃苗

棄田不耕。城中訛言四起。知州明安泰。知苗將為變。念城中泉少。令州人捐銀四百兩。託詞修城。潛于西門外。暗穴一渠。引水入城。晝伴修城。夜實穿渠。畏狃苗知也。工甫竣而逆苗反。二年正月二十一日。苗大至。州城豪傑大呼曰。城外寸步皆苗。舍此巖城。將安死。一呼而登陴者濟濟焉。器械犒備。人心頗安。逆苗之在西門外者數萬。饗殮時。見延麓苗寨。承筐挈壺。以餉逆苗。明安泰見之。語衆曰。逆苗易與耳。城中宜嚴守不出。三日不出。苗必不備。乘其不備。出擊之。破苗必矣。越三日。宵黑。明安泰曰。天助我也。計自南山而北。凡苗寨二十有奇。選熟徑者三十人。潛出焚之。約大寨火起。衆齊舉火。苗驚亂。見各寨火。而城中寂然。疑城中兵民皆出擊。宵潰。自相躪殺。死者不可勝數。城中兵勇。比明乃出擊。盡焚餘寨。斬

苗無算。此正月二十七日事也。于是兵民得城外木石。運進修城樓。知苗必再至也。未幾。苗果又至。正西一股苗。十餘萬最強。正南一股苗。恃南門外之突阜。爲障蔽。守南門者多被傷。東北一股苗。恃珉球石爲障蔽。守東北者多被傷。守備江濤。守東北隅。燃礮擊苗。中苗火鎗。穿脛骨。此二處。守禦尤難。旋苗之在西屯。搆草舍儲糧。城中愈懼。明安泰乃與衆計。前焚寨而苗走。惜未設伏。乃定計。再以兵焚擊。後路寬曠。苗必後走。分兵爲兩翼。一南一北。合擊以襲其後。又于南北城下。各伏二十人。城上多金鼓以應之。苗前趨至城。伏發。再合擊之。如計行。斬苗萬計。乃于南門外之突阜上。運石築礮樓。與城爲犄角勢。守以十人。火鎗三十。以備連環迭發。又于東北珉球石邊。近城處。築一石城。名曰難民城。令四方來之難

民居守。難民城中。凡居守者。二千餘人。明安泰予之口糧。于是聲勢相聯。而州城愈固矣。此自二月至三月事也。後苗日則以梯攻城。夜則詐爲我兵衣冠。掘州人墓。鑿險燬橋。向城譟曰。今又斷絕汝某處險要矣。兵勇時出擊之。皆勝。苗又欲決渠水。爲礮樓火鎗擊退。四月初九日。守備周斌。張文貴。聞大兵在新城。欲開東路近大兵。率衆至十里坡。擊苗勝之。進焚苗寨。苗走而西。追之。至西城外田壩廠。欲入城。以連日雨。田中水積。陷泥淖中。南屯苗。見而來襲。西屯苗。亦大至。合攻。周斌。張文貴。與把總王舉。武舉人段自成等。皆戰死。自是州城嚴守不出戰。至八月。逆苗勢益熾。以所得九節礮。及大礮十數。攻城。礮子入城如雨。而九節礮尤猛烈。先是苗燃一礮。自震死數人。礮子飛城過。穿擊州署側之大樹。後石上。樹

去兩枝。石爲兩破。于是城中揚言以給苗曰。幸苗未知填滿火藥耳。若填滿。城危矣。詰朝。苗填火藥滿。礮脹裂。震死數苗。乃懼不敢燃礮。州城兵勇出其不意。裸而擊之。苗大潰。盡獲其礮。二十八日。大兵至。城中出合擊。苗平。夫以數十萬之苗。攻斗大州城。明安泰一文吏耳。乃率官紳士民。與共戰守。歷九閱月而城卒完。此皆官紳士民共矢忠蓋戮力同心之故。亦由聖主仁愛之忱。上格天心而

天威廟算。大帥恪守而救援。故小醜卒平。而孤城率保也。

附詩

七月既望。助守巡更。聞大帥威威公。援兵將至。喜而有作。

嘉慶歲
貢生 黃國寵 貞豐人

刁斗森嚴夜擊柝。逆苗數萬圍城郭。盼到

王師眼欲穿。七月圍城勢將弱。蠢爾羣苗喜欲狂。罷耕嗜殺弄機槍。掠焚不識干天怒。醜酒椎牛向戰場。戰場夜飲唱苗歌。月明偏向賊營多。我軍惕然枕戈起。莫之敢櫻喚奈何。亦有援兵一旋至。彼衆我寡苗愈肆。四月城西出擊苗。將能死戰苗多死。那知戎馬還瀟敗。守陴皆哭兵都潰。書生揮淚弔忠魂。熱血一腔和淚灑。可憐賢牧強支撐。計口分糧共死生。礮築濠成邪術破。護城更建難民城。戰守于今逾半載。糧盡無援氣欲餒。孤城獨寄天一涯。萬里旌旗焚香待。元戎十乘先起行。羽檄傳來姓氏香。奚爲後我雲霓望。大兵十萬剪封狼。今宵父老相慶樂。數萬生靈命有託。西風遙送凱歌聲。指顧天南旌頭落。

見師中
詩草

詔改永豐州為貞豐州紀事

黃國寵

百年沾

雅化。

聖主錫嘉名。洞悉斯民苦。

旌揚大節亭。重圍逾九月。此幸紀三生。

天語煌煌至。榮褒一字貞。

詔改永豐州為貞豐州紀事

嘉慶生員黃國璽貞豐人

蕞爾邀

天寵。千秋表令名。山城經困憊。世運轉豐亨。克敵人爭死。迎祥氣

復生。

九重恩湛渥。所重是忠貞。見用中詩草

弔陣亡四將

嘉慶貞豐州知州劉永安順天人

守備周斌。貴定人。張文貴。平遠人。把總王舉。武舉人段自成。並

大定人。擊苗戰死。

周張虎將不惜死。段王二將亦如此。窮寇莫追古戒之。畏不追殺

丈夫恥。殺賊死。死亦喜。死殺賊。為厲鬼。

弔二十三烈女

劉永安

烈女二十三人。姓氏不可考。皆漢人也。為逆苗執。欲污之。拒罵。

苗盡殺之。刳腹。冒腸于邕皓寨之土地祠。

罵此賊。汚烈女口。死于賊。潔烈女身。嗚呼。二十三烈女。雖死今猶

生。

嘉慶平普安縣安南縣苗本末

元年正月初五日。府及永豐州苗反。普安縣安南縣苗皆應之。旋普安縣城及新城縣丞城皆被圍。普安縣知縣支敏學率士民堅守縣城。安南縣知縣范來泰聞二城被圍。令安南士民安堵毋恐。時安南兵將亦征銅仁苗。畱城兵僅百。來泰聞新城被圍急。遣兵悉馳援新城。以安南諸要隘無兵守。急馳使告急于大吏。是月二十日。大吏令道員吳某赴安南助守。來泰乃與吳某及教諭邱從岱訓導張泰遠典史馬肇基千總劉應奉嚴修守備。二十六日。苗大至圍城。焚南門外民舍。城中士民請開門迎擊。吳某不許。與來泰登城于城上。以烏機礮擊之。擊死苗多。苗懼解圍去。焚掠各鄉。鄉民皆逃入城。其不克達城者。為苗殺無算。難民爭入城。有擁仆蹂躪死者。新城之被圍也。郡人守備張維紀堅守。城中楚北江西客民皆捐金助守。有壯士郭

某者。邵陽人也。與于守。苗勢甚盛。城計日將陷。把總李春榮擊苗于西門外。戰死。東城無故自崩。守者皆哭。郭某曰。哭何益。且止。毋亂衆心。乃手利刃。從容踰城下。突入苗寨。斬數十人。苗驚亂。自相躪殺。死無算。某又從容踰城上。自是苗常自驚。不敢逼城。安南援兵亦至。城中得樹柵築壘。完築崩城。四月十八日。勒保援兵至安南。率郡人守備李錦。千總馬韜。外委楊國仁。郡兵張世鳳等。解安南圍。馬韜與苗戰。手斬執白旗逆首一。追至大排山。焚苗卡四十有五。拔難民二百九十七人。張世鳳擊苗于安姑塘。手斬苗二。勒保又分兵攻排杉汛。涼風坳。李錦追擊苗于涼風坳。戰死。是月。勒保通道至新城。解其圍。新城之戰。楊國仁戰最力。手斬苗七。苗潰。勒保聞郭某事。予之官。以酬其功。郭某辭焉。于是勒保率大兵。進解府城圍。八月。勒保命翼長

常明率郡人武舉人劉得達外委張定邦及馬韜等進攻普安諸苗。劉得達與馬韜張定邦攻克樓下河。韜與定邦共擒西路王楊明。韜又擒僞大將軍楊成玉等。劉得達又攻克馬乃營。擒逆首王阿金等十八人。張世鳳助擒阿金。已而雲南巡撫江蘭與總兵德英額率兵自滇入黔。進解普安縣城圍。于是普安安南之苗皆平。敘功。范來泰升大關同知。來泰浙江人。新城守備張維紀升都司。維紀郡人。後征川匪戰死。生員楊名聲、吳學周等皆獎敘。有差陣亡守備李錦、把總李春榮等皆

予世職。撰補

嘉慶平黃草壩苗設興義縣本末

黃草壩、捧鮮、舊皆爲普安州地。黃草壩城駐普安州判。捧鮮城駐巡

興義府志

卷四十六

本末

五十

貴陽文通書局代印

檢。舊時普安州隸南籠府轄。嘉慶元年黃草壩城內白虹見。起自水晶觀之樹抄。亘天三日。占爲兵象。二年郡苗反。黃草壩、捧鮮苗亦反。州判丁楷與遊擊常山等堅守黃草壩城。五月初八日勒保命常山率兵援郡城。白水倒流。趨馬鞭田。常山至馬別河。橋燬。無舟可濟。乃營于岸左山巔。郡之逆苗韋阿信聞而與黃草壩苗合。夾攻之。官兵敗。丁楷率兵出援亦敗。常山與丁楷及把總陳宏典外委張世溥皆死之。軍士殲焉。于是苗進圍黃草壩、捧鮮二城。是月

純皇帝以黃草壩與雲南交界。命雲南巡撫江蘭與總兵德英額率兵協剿黃草壩苗。以捧鮮與廣西交界。命兩廣總督吉慶率兵自西隆州渡紅水江圍擊捧鮮苗。七月勒保命翼長常明率兵趨解黃草壩、捧鮮圍。江蘭命德英額率兵助之。于是常明率郡人武舉人劉君

成。劉德達外委張定邦、武生陳啓麟等進兵取道鄭屯，宵攻馬別河。苗啓麟督造河橋，濟師遂至黃草壩，解其圍。八月，張定邦又從常明、白魯布革進攻，與劉君成等解捧鮓圍。德英額率郡人把總保元龍等攻苗于江底汛，元龍力戰于金雞山，擒苗目二。又攻硝洞，至江底河，奪苗舟，進攻糯米寨，負傷進解捧鮓圍。又攻苗于挖鼠黑，勝之。黃草壩捧鮓苗皆平。常山丁楷等皆

予世職。鄉勇有功者楊文斌、劉拔萃、鄧子明、徐文榜、胡兆瑞、陳貴、許雙全、陳升等皆獎敘有差。三年，雲南總督鄂輝疏言：普安州地界滇粵，周圍七百里，苗獮雜居，所屬之黃草壩向設州判一，捧鮓向設巡檢一二處，地界極邊，距州治窈遠，苗疆險要，微員控馭難周。臣前在各路搜查餘匪，即據黃草壩耆庶呈列利弊，懇請改立縣治，回省會

同撫臣馮光熊並各司道，共同計議。黃草壩必得改設縣治，一以整飭地方，一以控扼邊要。請裁平越縣，歸平越府，以平越縣典史移設黃草壩。黃草壩本係興義府所屬，請設縣，即名爲興義縣。其捧鮓巡檢，即隸興義縣分轄。黃草壩州判應裁汰，查普安縣所屬新城巡檢，微員不足以資彈壓，請將州判改爲縣丞，移駐新城，仍隸普安縣轄。又黃草壩改設縣治，應將普安州訓導移駐，改爲興義縣訓導。學額于普安州撥出二名，另設六名，共八名，疏入奉

旨依議。于是始設興義縣，隸興義府。十四年，升普安州爲直隸州，而興義縣改隸于普安州。十六年，改普安州爲直隸廳，而興義縣仍改隸興義府。至今仍之。撰補

按黃草壩之苗將變也。有白虹之異，占爲兵象。考之古，春明退朝

錄云。范魯公雜錄。紀周世宗時。白虹起淝水。貫城中。後城蕪廢。又李璟攻建州。有白虹貫城。未幾城陷。舍廬焚蕪殆盡。又蚓菴瑣語云。弱冠時。見嘉興城街。起虹一道。長百餘步。宛如大石梁。近視如煙霧。後城被兵。則白虹之占爲兵象。自昔然矣。

附文

請設興義縣疏

嘉慶雲
貴總督鄂輝

爲會籌善後。酌移縣佐各缺。分駐苗疆。以資治理。恭摺奏請聖訓事。竊查興義苗疆初定。臣等現在會籌。改設營汛。抽撥官兵。修築城堡各事宜。其文職縣佐及各營內。有安設未盡合宜者。必得酌量地方。先行移改。以資治理。查普安州地方。連界滇粵。週圍七百里。山深箐密。苗獠雜居。所屬之黃草壩。向設州判一員。捧鮮。

興義府志

卷四十六

本末

五十一

貴陽文通書局代印

向設巡檢一員。雖有分防地方。例止稽查偷竊賭博細故。該二處地界極邊。距州治窈遠。凡涉田土命盜案件。及一切錢糧。均應赴州審理交納。不獨該州往返催提。耽延時日。卽民苗亦深以遠涉爲苦。若責令州判巡檢專辦。究非正印官員可比。且苗疆險要。微員控馭難周。亦非慎重邊郵之道。臣前在各路。搜查餘匪。體訪民情。卽據黃草壩耆庶。呈列利弊。懇請改立縣治。回省後。會同撫臣馮光熊。詳細熟籌。並令各司道。共同計議。黃草壩一處。必得俯順輿情。改設縣治。一以整飭地方。一以控扼邊要。查有平越府之平越縣。雖係附郭首邑。但該府各管各地。幅員不廣。事簡民淳。若將平越縣。裁歸平越府。儘可料理裕如。且縣屬西陽一驛。以一隅之地。界於府管之中。一切驛務。辦理殊形掣肘。應請將平越縣典史。

汰移設黃草壩地方。該處本係興義府所屬。即名爲興義縣伏候
欽定。其捧鮮巡檢。向係普安州所屬。應請即隸新改之興義縣分
轄。庶鉗制得宜。在普安州劃出地方。撥歸該縣管理。既無鞭長莫
及之慮。而平越辦理酉陽站務。呼應亦復較靈。似爲兩得。至黃草
壩既設知縣。其向設州判一員。應即裁汰。查普安縣所屬新城巡
檢。有經管倉糧。安撫苗疆之責。該處距縣城較遠。民苗雜處。係通
興義要路。巡檢微員。不足以資彈壓。應請將黃草壩州判。改爲縣
丞。移駐新城。仍隸普安縣管轄。其新城所隸巡檢一員。查永甯州
所屬之募役司地方。向係土司管理。今土司宗派。無人承襲。該處
萬山林立。苗寨櫛比。道通盤江關嶺。現擬設汛駐兵。得有分防文
員。益昭慎重。應請將新城巡檢。改爲募役司巡檢。移駐該處。仍隸

永甯州管轄。如此酌量轉移。苗疆要地。各有縣佐專司。於撫輯更
爲周密。再平越之首邑平越縣。既請裁汰。僅轄湄潭甕安餘慶黃
平四屬。政務較簡。應請將平越府。改爲直隸州。其所屬黃平州。介
在鎮遠府施秉縣之間。鎮遠府僅轄鎮遠施秉天柱三縣。今平越
既改爲直隸州。請將黃平州。改隸鎮遠府屬。以符體制。其向設平
越府經歷。即請改爲平越直隸州吏目。其教授訓導二員。應請裁
汰。即以擬裁之平越縣教授訓導。改爲平越直隸州學正訓導。其
平越縣向設學額八名。即歸平越直隸州進取。又黃草壩改設縣
治。應請將普安州學正訓導二員。內撥出訓導一員。移駐該處。作
爲興義縣學訓導。其生童學額。請於普安州撥出二名。另設六名。
一共八名。定爲小學。其改設各官。應需俸廉等項。即以裁缺俸廉

等項撥補。如有餘剩。造報歸公。如此則費不加增。而治理得宜。於苗疆實屬有裨。除將應定缺分繁簡。應給印信鈐記。及一切裁改事宜。分別辦理。另行報部查核外。所有會籌移設苗疆縣佐各缺緣由。理合恭摺具奏。伏乞皇上睿鑒。勅部議覆施行。謹奏。

按大事本末二卷。與大事紀年一卷。互相補苴。相輔而行。一經一緯。或詳或略。覽者參觀焉可。

